

## I primi Corsi

**Laurent-Jacques COSTA,  
Duttore in preistoria, cercadore di u CNRS**

U pupulamentu di a Corsica è di a Sardegna hè un sugettu di tanti dibattiti sti vinti ultimi anni, à livellu di a so anzianità è nant' à a quistione di e mudalità di a prima culunizzazione di e duie isule. Oghje, s' elle fermanu numerose incertezze, u misteru di i primi pupulamenti di st' isule hè risulutu grazia à travagli di parecchi programmi cullettivi di ricerca finanziati da u ministeru di a Cultura, a Cullettività Territoriale di Corsica è l'Unione Europea.

### I primi tempi di a cunquista

Quand' omu tratta u sugettu impurtante di l'avenimentu di una sucietà o a cunquista di un spaziu novu, a prima interrugazione hè di sapè a datazione di l'eventu. A risposta à sta quistione hè primurosa perchè hà implicazioni tamante nant' à u cuncipimentu stessu di ste prime sucietà è u so sviluppu futuru. Da quì vene l'impurtanza di u dibattitu nant' à l'anzianità di e prime culunizzazioni umane di l' isule Corsa è Sarda, dibattitu trà quelli chì credianu à un pupulamentu bellu anzianu da gruppi d' *Homo erectus* (più di 300 000 anni fà) o gruppi neandertaliani (trà 60 000 è 80 000 anni) à quelli chì suppunianu un pupulamentu abbastanza traticciu, datendu à u più di 10 000 anni.

I primi fondu e so ipotesi nant' à i scavi (fouilles) di un situ, à u nordu di a Sardegna, chì hà porsu millaie di pezzi di scaglia zuccati à modu assai rozu. Vulendu puntellà l'idea d'una frequentazione di u situ da *Homo erectus*, più di 300 000 anni fà, sti circadori mettenu in risaltu a pusizione stratigrafica di e vistiche zuccate chì ripusavanu nant' à una cola (coulée) di sedimenti assai anziani è sopr' à tuttu l'arcaismu di l'ogetti. Travagli criticati da a cumunità scientifica per via di a debulezza di l'argumentazione. Ci vole à dì chì, cum'ellu ùn ci hè resti organichi pudendu esse direttamente datati (ossami o carboni), a cronologia di stu situ ùn pò esse assicurata, sopr' à tuttu chì parecchi indizii, per esempiu l'assenza di ogni elementu zuccatu specificu à u Paleuliticu, ùn accertanu un'anzianità di e vistiche cusì luntana.

À a metà di l'anni novanta, un'altra scuperta in Capicorsu hà lasciatu crede à una frequentazione pussibile di l' isula da Néandertal, 60 000 anni fà o ancu di più. Si trattava di un'impurtante accumulazione di resti di faune in fondu à un abissu. St'ossami, frà quessi numerosi resti d'un cervideu endemicu (*Mégaceros cazioti*), eranu stati datati trà 60 000 è 80 000 anni. Tandù, i scavadori di u situ avianu suppostu chì l'omu pudia esse rispunsevule di st'accumulazioni d'ossami.

Però, nisuna vistica d'attività umana hè stata scupertata in leia cù st'osse ; in più, u fattu si stà ch'è i dipositi fubbenu custituiti da per elli perch'è e vistiche sò state carriate da corsi d'acqua sutterranei sin' à u locu di scupertata. Un altru situ, à u nordu di a Sardegna, hà porsu carboni di legnu di 13 000 anni fà, assuciatu in un stessu stratu archeologicu à frammenti ossei è sgarbe zuccate (éclats taillés). Ma st'ultime rimandanu à pruduzzioni neolitiche, dopu à 6000 nanz' à Cristu, è mostranu cusì l'impurtanza di e rimanighjate avendu toccu stu ghjacementu.

In cunclusione di u spostu di sti sfarenti casi, si pò ammette ch'è u dibattitu nant' à l'iputetiche culunizazioni paleulitiche di l'isule di Corsica è di Sardegna s'hè fundatu, sin' à avà, nant' à scuperte datate male o dati archeologici d'attività umana incerta. Eppure, l'assenza di prova ùn pò è ùn deve esse cunsiderata cum'è una demustrazione. Vale à d'è ch'è a mancanza di dati accertendu frequentazioni paleulitiche ùn assicureghja ch'è l'omu paleuliticu ùn abbia mai frequentatu u locu.

Sì l'indizii d'una culunizzazione paleulitica di st'isule mancanu oghje ghjornu, avemu quantunque à prò nostru numerosi dati testimuniendu d'una frequentazione umana à parte da 9 000 nanz' à Cristu : nove siti cunnosciuti è scavati (7 in Corsica è 2 in Sardegna) è duie sepulture (in Bunifaziu è Petracurbara). Un altru elementu capitale hè quellu esciutu da i travagli di Jean-Denis Vigne nant' à i siti di Gritulu (Capicorsu) è Monte Leone (Bunifaziu) : ghjè l'assenza d'indiziu testimuniendu di un'occupazione umana durante a trasizione Tardighjacciaru-Olocene, trà 13 000 è 9 500 nanz' à Cristu. Dunque, a presenza di l'omu mudernu in Corsica è in Sardegna serebbe liata à a ghjunta di pupulazioni nove, durante u Mesoliticu, venendu forse da e coste taliane e più vicine. St'ipotesi hè rinfurzata da tante sumiglie custattate trà u trattamentu di u mortu interratu in Bunifaziu, è quellu d'altre sepulture mesolitiche, in l'Arene Candide (Liguria, Italia) per esempiu. Difatti, in sti dui casi, i schenetri ghjaccianu à corpu insù, bracce long' à a persona, pedi aghjunti, capu à latu in pusizione furzata\* è eranu stati cuperti d'una sustanza minerale rossa (forse l'ocru).

In cunsequenza, qualsiasi a rialità di e frequentazioni paleulitiche di st'isule, e sucietà ch'è ci si svilupponu dopu l'ultima ghjacciata avianu un'uridine strettamente cuntinentale. Però, a presenza di pupulazioni mesolitiche in l'isule ùn significheghja ch'èlle abbianu inghjennatu sucietà agropasturali, quesse si svilupponu à parte da u VIu millenariu nanz' à Cristu, o ancu ch'èlle abbianu cuntinuu à l'evuluzione di ste sucietà. Parechji scenarii sò pussibili : un pupulamentu cuntinuu dappoi u Mesoliticu (cù acquisti da fora più o menu frequenti) o puru, à l'incuntrariu, un'occupazione scuntinua di st'isule da gruppi di culture sfarenti.

## **Frequentazioni scuntinue o vere culunizzazioni ?**

À principiu di l'anni settanta, François de Lanfranchi è Michel-Claude Weiss trovavanu in l'agrottu d'Araguina-Sennula (Bunifaziu) una sepultura datata trà u 7950 è 7200 nanz'à Cristu. L'individuu dissutteratu - chì avia da diventà a famosa "Donna di Bunifaziu" - ripresentava tandu a più anziana vistica antropica di u bloccu corso-sardu. Una decina d'anni più tardi, Jacques Magdeleine scupria in Capicorsu un'altra persona, datata versu 7000 nanz'à Cristu : dunque a Corsica era stata popolata, da u nordu à u sudu, da gruppi umani toccu l'VIIIu millenariu. Quandu si facianu e scuperte, ùn si cunniscia nunda di u modu di vita di sti primi gruppi umani, nè d'altronde di l'ambiente induv'elli avianu evulatu : cusì, omu supponia ch'ellu si trattava di i più vechji antenati di e popolazioni attuali. Dapoi tandu, e scuperte si sò accumulate è avemu oghje nove siti scavati pè e duie isule.

A data di ste prime frequentazioni hè stata « invecchjata » di quasi un millenariu (trà u 9700 è l'8650 nanz'à Cristu, à u Monte Leone). À l'iniziativa di un programma cullettivu di ricerca, direttu da Jean-Denis Vigne da u 1997 à u 2001, s'hè pussutu restitù u regime alimentariu di ste popolazioni, capì e mudalità d'occupazione di i siti isulani, cunnosce a so durata è a so frequenza. S'hè pussutu dinù ricustitù i paisaghji induve campavanu i primi abitanti è amparà cusì e so strategie di sfruttamentu di e risorse dispunibili. Face chì a rinomina ch'è no aviamu di sti primi culoni hè cambiata cumpletamente. In u duminiu ambientale, e fureste eranu abbastanza scarse, avendu in magiurità querci cù fronde cascatice, tassi (ifs), tiglioli, alzi (aulnes) è larici pè i piani suprani. A maiò parte di l'arbori simbolichi di st'isule (lecce, suare, pini marittimi, castagni è ulivi) ùn ci eranu. Sta mancanza d'arbori era u risultatu di scunvuglianti climatichi à principiu di l'Olocene, 10 000 anni fà : un scaldamentu climaticu impurtante accumpagnatu di fucaroni (grandi fochi). Numerose stratigrafie\* in u Mediterraniu, cum'è quella di Gritulu in Capicorsu, testimonieghjanu di l'impurtanza di sti fochi naturali. Cunsequenza di a trasfurmazione di i paisaghji : a sparizione di a grande fauna terrestre, digià assai impuverita da longhi millenarii d'isulamentu...

Ste fase d'abbandonu eranu materializzate in e stratigrafie da strati intercalati, archeologicamente sterili (in Strette o in Porto Leccio per esempiu) o mustrendu una rioccupazione di l'agrotti da rapaci (in Araguina o in Monte Leone).

A pruposta di pupulamentu, fatta in u 1999-2000 da L-J Costa è J-D Vigne, hè quella di « piscadori numadi custeri » trà 9000 è 7000 nanz'à Cristu, pè u più nant'à i lidi perchè ci eranu numerosi cunigliuli-topi, cunchiglie è pesci. Stu modu di vita ùn averebbe impeditu certi gruppi di splurà l'internu di e terre ma i spazii di machja eranu pocu attraenti pè una stallazione durevule di e cumunità.

Ancu s'è stu mudellu era sustenutu da tutti i circadori travagliendu nant' à u sugettu, pare accurdassi pocu è micca cù l'ultime scuperte nant' à a frequenza di l'occupazioni. Difatti, nisun situ hà datu elementi (per esempiu un pezzu di scogliu o un'essenza vegetale particolare) permettendu di stabilì una leia trà dui siti liturali è dimustrà cusì u spiazamentu da unu versu l'altu. À l'incuntrariu, ogni situ pare currisponde à unu o parechji arrehji di piscadori taliani ùn stendu sopr' à locu è frequentendu pocu pocu l'isule, sicuramente durante l'estate... Hè certa chì nisuna pupulazione culunizendu l'isule mediterranee, trà l'VIIIu è u VIu millenariu nanz' à Cristu, hà avutu vere leie cù cumunità di piscadori di u Mesoliticu.

Lessicu :

- Pusizione furzata : un mortu hè in pusizione furzata quandu i membri è u capu sò stati ubligati (da un lenzolu, leie...) d'aduttà una pusizione micca naturale.
- Stratigrafia : soprapusizione di strati sedimentari tocchi da sfarenze di tessitura è di culurazione chì permettenu di stabilì cronologie. Per esempiu, l'ultimi livelli di a stratigrafia di l'agrottu d'Araguina-Sennula induve si vedenu strati cenderosi, testimonianze di l'occupazione umana.
- Preistoria : perioda cronologica di a vita di l'umanità dapoi l'apparizione di l'omu sin' à quella di a scrittura.
- Protostoria : perioda cronologica intermedia trà a preistoria è a storia è chì currisponde à u spannamentu di culture cunniscute à modu indirettu da testi.

## U misteru di e statue-stantare

**Henri Nicolai - Laurent-Jacques Costa**



Vechje di millaie è millaie d'anni, opponenu i so visi di petra à l'omi d'oghje chì cercanu à capille. Sì a ricerca archeologica cumencia à chjarificà u so misteru, parechje incertezze fermanu.

Nant'à u pianottulu di Cauria, piantate à mezu à i campi verdicosi di sta bella valle di Sartè, e statue-stantare sò cum'è e guardiane di grandi catedrali. Ancu sì l'archeologia hà fattu scuperte nant'à sti monumenti, quesse inghjennanu altre interrogazioni è ùn si sà s'ellu si riescerà à scudificà tutalmente u misteru di e petre alzate.

### **Anu fattu a paura**

Tempi passatoni, e pupulazioni isulane temianu durante una bella stonda e statue-stantare. Ste siluette di petra eranu cunsiderate cum'è esseri petrificati pè avè trasgreditu u codice murale. In u Sartinese, una legenda illustregghja a credenza in un casticu divinu. Difatti, duie stantare, scantate in a piaghja di u Rizzanese à l'arice di u fiume, simbulizeghjanu un frate è una sora stantarati da u celu pè avè vulsutu fughje i cunventi di Sartè in un scapatricciu d'innamurati.

Oghje ghjornu, e statue-stantare sò cunsiderate cum'è a testimonianza di i tempi landani è barbari. Un tempu animatu da guerrieri valenti, introitu à a civilizzazione. Dunque, quale sò sti persunagi alzati à mezu à i campi ? Chì curanu è chì ghjè a so funzione ?

### **A prima regione mediterrania**

E risposte sò primurose pè a cumprensione generale di a preistoria è anu un interessu particulare pè a Corsica : hè a prima regione mediterrania riguardu à a statuaria megalitica cù più di 800 stantare è pussede l'infilarata più impurtante di u Mediterraniu. Per esempiu, l'infilarata di Paddaghju, nant'à a strada da Tizzà à Sartè : 258 stantare è 3 statue-stantare sò addunite. Secondu Laurent-Jacques Costa è Michel-Claude Weiss « ùn si pò datà direttamente l'epuca di custruzione di e statue-stantare. L'archeolochi anu à prò soiu solu indizii esciuti da u cuntestu d'impiantazione di i megalitichi o di riferenziali

cronologici nant'à attributi zuccati, in particolare l'arme ». St'indizii bastanu quantunque pè permette à l'archeolochi d'affirmà ch'è a magiurità di e statue-stantare sò di un'epuca trà 2 500 è 500 nanz' à Cristu.

### **Guerrieri in arme**

I circadori provanu à capì quale sò i persunagi ripresentati. À l'incuntrariu di ciò ch'omu pò crede, e statue-stantare di Corsica sò assai pare. Essendu cumuna à tutti i gruppi umani di l'isula, sta cudificazione cambia s'ellu si studieghja l'altri gruppi mediterrani sardi, taliani è di u Meziornu di a Francia. Difatti, « e variazioni stilistiche parenu pè u più liate à a morfologia di u bloccu di partenza o à una schematizzazione cresciuta di certe parti di a statua. Cusì, certe sò più slanciate chè l'altre, unepoche anu un capu bellu spiccatu da u bustu per via di un collu sgagiatu mentre ch'è altre piglianu a forma d'un mozu (borne), secondu i scientifici.

Ogni tantu, s'osserva a presenza d'arehje ma a magiurità di e statue porta piuttosto cuffie o elmi in forma di cuppette. E bracce sò pocu ripresentate è e gambe ùn ci sò mai. A forma di i visi hè spessu ovale ma i tratti sò quasi sempre ripresentati in listessu modu : ochji incaravunati, nasu stinzatu è bocca aperta ».

### **A forma fallica amentata**

À l'incuntrariu, e statue-stantare ùn sò micca pare in e so figurazioni vestimentarie. Parechje ripresentanu guerrieri armati è sò scarse e statue avendu un'armatura ma micca arme. A statua-stantara ripresenta di regula un omu è certe anu una cunnutazione fallica bella precisa. Laurent-Jacques Costa a dice : « nant' à certi aspetti, ci hè una currispundenza fallica, a ripresentazione di u guerrieru inghjenna un sintimu di forza, di putenza maschile. In sta cosmologia, a fiura fallica hè stata integrata in tutte e culture è e so ripresentazioni. » In cunsequenza, un'ipotesi simile suggerita ogni tantu in a descrizione di stantare ùn hè un fantasmu ma una rialità storica. E sfarenze trà e diverse statue-stantare averanu una significazione ? U parè di i cercadori hè sfumatu (nuancé) : significazione pusitiva sì e statue sò state edificate in umagiu à persunalità di a cumunità ma « u granitu è l'altri scogli impiegati si rodenu prestu è l'intagli di numerosi megaliti anu pussutu sparì cù u tempu ».

### **Eranu pinte in rossu ?**

Altru elementu stunante : a scupertu di una ciottula (godet) intinta di petra sanguigna (hématite) à u pede d'una statua-stantara di Cauria. Dunque, e stantare averebbeno pussutu esse pinte dinù. A culurazione in rossu di parechji

megaliti di Filitosa è di Cauria pare accertalla. Sia ch'ella sia, l'epuca d'edificazione di e statue corrisponde à una perioda assai turbata in Mediterraniu : l'edificazione di e fortificazioni militari è a presenza di i guerrieri anu una piazza primurosa in a sucietà.

In quellu tempu, a Corsica hà una centinaia di castelli à vucazione difensiva, avemu quì in fatti « un'ambianza guerriera » in ste cumunità. Ma tandu, s'interrugheghjanu l'archeolochi, s'è statue-stantare anu figurazioni guerriere, ghjovanu à chè ?

Frà a cinquantina d'infilarate recensate (à l'ingrossu in Sartè, Livia, Purtivechju, Grossa), e stantare sò assuciate spessu à sepolture megalitiche, sò spessu vicine di stazzone, tombe o cascioni. À sente i cercadori, « a prima destinazione di e stantare hè liata à u duminiu funerariu è omu pò sugerì ch'elle corrispondinu in fatti à stele o petre tumbali ».

### **Guardiani di i lochi di passu**

Ma u prublemu di e statue-stantare ferma sanu. Quì dinù, a lualizzazione spaziale pò aiutà à capì : « statue-stantare sò situate vicinu à abitaculi o nant' à lochi di passu impurtanti. Cusì, quella di l'Inzecca era edificata à l'entre di u calancone (défilé), chì hè una di e vie liendu a piaghja orientale è a costa occidentale. A statua-stantara di Buccentone hè stata trova à l'entre di un calancone scugliosu sbucchendu nant' à a bocca di Tenda.

L'assenza di regula unica in l'impiantazione di e statue-stantare face chì parechje ipotesi sò pussibili. I cercadori sò cunvinti chì, s'è stantara ripresenta una stela funeraria, a statua-stantara « pare ricordà di più un persunaghju particolare, mitologicu o reale, ma forse emblematicu di a sucietà di l'epuca, induve i guerrieri avianu una piazza capitale ». Dimula puru : e statue-stantare serebbenu state incaricate di materializà limite territoriali, vie di passu o lochi d'attività. Eppure, e ricerche ùn anu micca palisatu tuttu nant' à i guerrieri di petre.

### **Situazione**

In Corsica, avemu più di 800 stantare. Ùn sò mai petre roze ma sò state zuccate pè ottene forme stilizzate. Truvemu dinù una centinaia di statue-stantare ma i cercadori sò persuasi ch'ellu ci n'hè assai di più. E prove ùn mancanu : omu e scopre in i muri è e costruzioni di diverse epuche. E statue sò state appezzate è aduprate torna (esempiu : in u castellu di Filitosa o in l'anziana catedrale di Sagone). I costruttori di tandu ci trovavanu sicuramente un materiale pocu caru ma u patrimoni corsu ci hà persu una parte di a so ricchezza.

Hè stata scuperta a più grande statua-stantara di Corsica in Ulmetu (Pumonte). Cù i so 3,74 metri, Santa Naria (u so nome) hè a megliu cunservata di l'isula per via di a so pusizione stracquata dapoi tempi è tempi. U fattu d'arrizzalle rode u granitu di i visi.

### **Epuche preistoriche**

A terminologia aduprata pè suddivisà e culture preistoriche in u tempu si faccia à u XIXu seculu. Hè stata fundata nant'à a nuzione di « prugressu tecnicu », ch'omu vantava à u seculu industriale. Sta cronologia suddivide l'Età di a petra in Paleo- (Anzianu o petra zuccata), Meso-(Mezanu) è Neo-(Novu o petra allisciata) liticu. L'Età di i Metalli chì venenu dopu sò divisi dinù in trè fase : l'Età di u Ramu (Calcoliticu), di u Bronzu è di u Ferru. S'è sta classificazione solu « tecnologica » ferma à l'ingrossu ghjusta, omu li preferisce oghje ghjornu quella, più larga, chì piglia in contu l'evuluzione di i modi di vita è di vittu (subsistance).

### **Dati generali**

A preistoria di a Corsica principia 10 000 anni fà, quandu i piscadori di u Mesoliticu cumincionu à frequentà e coste.

Prime frequentazioni di l'isula da gruppucci di piscadori numadi. (IXu-VIIu mil. nanz'à Cristu)

Culunizazione effettiva di l'isula da cumunità agropasturali casarecce. (VIu-IVu mil. nanz'à Cristu)

Pruduzione d'ogettucci in ramu arseniatu : lesine (alènes), ornamenti, lame... (IIIe mil. nanz'à Cristu)

Sucietà guerriere chì custruiscenu Torre è Castelli. Rimpiazzamentu sanu di l'industrie in petra da u metallu (Bronzu). (IIu mil. nanz'à Cristu)

A Corsica entre in l'Antichità cù a stallazione di i Fuceani in Aleria, in u 565 nanz'à Cristu.



## Periode

### **Neoliticu**

E sucietà di u Neoliticu anzianu di Corsica ùn sò tantu sfarenti da quelle di u circondu mediterraniu, è ne sò uriginarie. Sò piccule cumunità praticendu l'agricultura, l'allevu è sfruttendu tutti i biotopi disponibili ) l'ingiru.

E so pratiche è e so pruduzioni materiali parenu listesse chè quelle di e pupulazioni cuntinentali : e so usanze alimentari parenu equivalenti (agricultura di biade, allevu di muntoni, di capre è di porci), e pruduzioni ceramiche sò listesse è l'industrie litiche s'assumiglianu abbastanza, malgradu un accessu più difficile à e materie prime di bona qualità, per via di l'assenza in l'isula di scaglia è d'ussidiana.

I gruppi corsi mantenianu d'altronde certe rilazioni cù l'altre sucietà mediterranee, ne testimonieghjanu impurtazioni di materie prime (scaglia, ussidiana) è di prudutti, da a Sardegna è da l'Italia.

Long'è u Neoliticu sanu, e « culture » preistoriche di Corsica s'assumiglianu propriu à quelle di a costa occidentale di l'Italia, lascendu induvinà altru chè semplici scambii cumerciali, in fatti sò spiazamenti di pupulazioni. Ghjè solu à a fine di a perioda ch'elli s'affaccanu i fundamenti d'una sucietà isulana cù i caratteri identitari affirmati ; e manifestazioni megalitiche – in particolare e statue-stantare – essendu solu e caratteristiche maiò.

### **Calcoliticu**

I scavi di u situ di Terrina IV (Aleria), cundutti da G. Camps da u 1975 à u 1981, ci anu fattu cunnosce assai megliu a fine di u Neoliticu di Corsica. Pè a prima volta, parehje vistiche ceramiche, litiche è fauniche assuciate à i resti d'una pruduzione metallurgica fubbenu scuperte in strati umugeni, di u principiu di u IIIu millenariu o di a fine di u IVu. U Calcoliticu (Età di u Ramu) di Corsica era infine ricunnisciutu.

E vistiche scuperte in Terrina testimonieghjanu d'un rinnovu di e pruduzioni trà u IVu è u IIIu millenariu. Eppuru, ùn ci vulerebbe à cunclude ch'ellu si trattessi di una trasformazione sana di i modi di vita di e pupulazioni isulane. L'architettura di e case (fundazioni in petre è muri fatti in mena (mortier) di terra è di paglia) ferma listessa. I modi di vittu, pè u più fundati nant'è l'allevu vaccinu è a manera di gesti una grande parte di e risorse, ùn parenu mancu elli mudificassi trà u IVu è u IIIu millenariu.

In fatti omu assiste à un'evuluzione socio-ecunomica è tecnica, inghjennata in magiurità da u sviluppu di a metallurgia è a crescita di l'insicurezza, chè anu pruvucatu cambiamenti socio-ecunomici. Fora di Terrina IV, chè data di u principiu di a perioda, i siti calcolitichi presentanu caratteri difensivi : sò impiantati nant' à piccule cullette abbastanza scuscese, ancu s'ellu ùn si tratta di veri sproni barrati (avanzata scugliosa chjusa nant' à u so solu latu accessibile grazia à una furtificazione). A divizia di e punte di frezza in e cullezioni suggerisce tensioni o ancu cunflitti trà cumunità. À a fine di a perioda, in numerose cullette, omu hà custruitu furtificazioni in petre (I Calanchi, Basi, Cauria, Monte Lazzu...), testimuniendu sicuramente di l'insicurezza à quell'epuca ; u fenomenu si ritrova in l'altre isule mediterranee è tutte e zone di u circondu mediterraniu.

### **L'Età di u Bronzu**

L'isule di a conca occidentale di u Mediterraniu (Baleari, Corsica è Sardegna) anu cunnisciutu un sparghjimentu demograficu tamantu, toccu a fine di u Neoliticu. E pruduzioni agropasturali è u cumerciu, chè si sviluppavanu assai durante a perioda anteriore, crescenu ancu di più. Cù l'avenimentu di a metallurgia, nove strade cumerciali si sò create è nove ricchezze sò affaccate.

Tandu, e sucietà mediterranee anu avutu un sviluppu economicu mai accadutu nanzu, rinfurzendu e sparità, pruvuchendu nimichizie, guerre è atti di pirateria. Pè prutege e pruduzioni è e ricchezze, ste sucietà sò state ubligate d'edificà custruzioni sempre di più sode è impunenti, chè l'assicureghjanu un più bonu cuntrollu di e zone sfruttate è un rifugiu s'elli ci sò cunflitti.

Dunque, tutte e pupulazioni di Corsica si sò date prugressivamente un sistemu difensivu equivalente à quellu di l'altre isule, è cusì avemu oghje più di 100 castelli è torre long' à e valli è vicin' à i spazii fertili, per esempiu ci n'hè assai in u rughjone di Purtivechju è in u Sartinese. Sta crescita di l'insicurezza, chè si pò avventà digià durante u Calcoliticu, hè l'elementu maestru di e sucietà di l'Età di u Bronzu, quesse anu un aspectu appezzatu, ogni cumunità ci gestisce rughjoni limitati à lenze (bandes de terrain) in i valli è si prutege di e pupulazioni vicine quant'è di l'invasori pussibili.

### **Età di u Ferru**

Sì pochi siti di l'Età di u Ferru sò cunnisciuti oghje ghjornu in Corsica, l'isula hè amentata assai prestu ind'è l'autori anziani ; stu fattu permette d'ottene, in mancanza di dati archeologici numerosi, infurmazioni preziose nant'à a so situazione ecunomica à u primu millenariu nanz'à Cristu.

A Corsica chjamata Kurnos (o Kyrnos) da i Grechi, Korsika da l'indigeni è i latini, hè descritta da tutti cum'è un'isula muntagnola, imbuschita, cù fureste di pini, di querci è cuperta di machja arburiscente. Ptolémée cita i nomi di dodeci populi occupendula è campendu in una trentina di borghi, spartuti nant'à e coste è in l'internu. Si tratta capunanzu di sucietà agropasturali, chì parenu perpetuà i modi di vita di l'Età di u Bronzu.

Eppuru, cambiamenti primurosi si sò fatti long'à a seconda metà di u primu millenariu, cù in particolare l'abbandonu di i castelli è di i so paesi. L'abitaculu si spiazza tandu è omu edificheghja novi paesi, forse antenati di i paesi attuali.

In quant'à e pruduzioni ceramiche è metalliche di e cumunità corse, si custatta l'influenza crescente, durante u primu millenariu, di e culture classiche greche è italiche. Di sicuru, cuntatti esistianu digià dapoì una bella stonda, ma, à l'Età di u Ferru, avemu un veru sviluppu di e rilazioni cumerciali trà a Corsica è e coste di l'Etruria, eppo cù a parte orientale di u Mediterraniu. I Fuceani, in particolare, stallonu un fondacu (comptoir) in Aleria in u 565 nanz'à Cristu. A Corsica furnia tandu materie prime, prudutti esciuti da l'agricultura è da l'allevu, scambiendu cù ogetti finiti (ghjuvelli, arme è ceramiche). À sente à Hérodote (Vu seculu nanz'à Cristu), paria dinù chì numerosi mercenari di Corsica cumbattessinu à quell'epuca in l'armate cartaghinesi.

### Temì

L'archeologia multiplicheghja e so specialità cerchendu cusì à un sminticà nisun aspettu di e sucietà anziane. U modu di vittu (caccia, agricultura, cugliera...), l'abitaculu (permanente o à stonde, in petra o in legnu...), e pratiche funerarie (incinerazione, inumazione in cascione di petra, in terra...), e pruduzioni artigianali (ceramica, tagliu di a petra, metallurgia...) definiscenu e sucietà umane in u spaziu è u tempu. À un livellu più largu, l'archeologia pò, malgradu l'assenza di testi, trattà prublemi più generali : mudalità di pupulamentu è rilazioni di scambii trà e cumunità. Ghjè ciò ch'è no vi prupunimu di scopre quì.

I stili, e tecniche, i sapè fà ripresentanu tante vistiche di e sucietà nanz'à noi. U trattamentu di i morti hà un valore simbolicu forte chì ci porghje infurmazioni nant'à e credenze di l'omi di u passatu. Essendu cumune cù decine di culture in u mondu, stazzone (dolmens) è stantare (menhirs) partecipeghjanu à a vita spirituale di e pupulazioni preistoriche.

E case « di i vivi » sò agrotti miseri o paisoli d'agricultori casarecci, in petra o in legnu ma a pussibilità di campà d'una cumunità umana dipende capunanzu da **a so capacità à stabili è à tene rilazioni cù i so vicini ! Frequentate da i primi navigatori mediterrani, 10 000 anni fà, l'isule fubbenu un ghjornu culunizate da agricoltori.**

### **Artigianatu**

In e sucietà sedentarizzate di u Neoliticu è di l'Età di i metalli, l'organizzazione di u travagliu era assicurata da specialisti chì pruducianu bè pè a cumunità secondu e so cumpetenze. Ancu s'è numerose attività pudianu esse rializzate in un quadru casanu, parechje faccende abbisugnavanu un'amparera è un sapè fà troppu apprudufunditi pè esse assicurati da un individuu solu o da una sola unità famigliale. S'è certi paisani si cunsacravanu à i travagli di i campi o à l'allevu, altri fabricavanu ceramiche, zuccavanu u legnu è a petra, custruianu edificii, cunfezzionavanu arnesi, cunciavanu pelli, tessianu stoffe, filavanu a lana, trattavanu i prudutti di e raccolte...

Disgraziosamente unepoche di st'attività ùn anu lasciatu tracce perchè i materiali aduprati s'infragicavanu. À l'incuntrariu, altre attività, cum'è u travagliu di e terre rosse (argiles) à prò di a ceramica, di a petra zuccata o allisciata furniscenu numerose vistiche, permettenduci oghje di misurà l'evuluzione di i stili, di e tecniche è di i sapè fà di ste pruduzioni, in l'aghje geografiche date.

Trattendusi di e pruduzioni ceramiche è litiche di a Corsica, i stili è e tecniche testimonieghjanu sicuramente di un'integrazione di e sucietà isulane à grandi rete di scambii in u Mediterraniu occidentale : tutte l'innuvazioni tecniche è i currenti stilistichi di e sucietà mediterranee si ritrovanu in Corsica à e listesse periode è e grandi divisioni classiche di a Preistoria mediterranea ponu esse appiicate in l'isula, puru s'ellu ci hè qualchì variazione stilistica regionale.

### **Funerariu**

Tucchendu a perioda da u IXu à u IIIu millenariu nanz'à Cristu, vale à dì in i tempi di u Mesoliticu è di u Neoliticu sani, solu cinque sepulture sò state scuperte : in Araguina-Sennula, in Torre d'Aquila (Petra Curbara) è in un agrottu di a Punta di Murtuli. In tutti sti casi, si tratta di u sutterrà d'una persona adulta in un agrottu, occupatu ogni tantu da gruppi muvitothji.

À parte da u IIIu millenariu (Calcoliticu), e sepulture cunnisciute (Cauria, I Calanchi...) cuntenu ossami presentendu tracce d'ustione (trattamentu termicu di i cadaveri) è testimonieghjanu cusì d'un trattamentu di i morti ch'ùn hè più quellu di e periode di nanzu. Stu studiu glubale di l'insemi sepulcrali neolitichi è calcolitichi di Corsica accerta a puvertà di e scuperte. Hè propiu difficiule, vistu u statu attuale di a documentazione, di discorre di l'evuluzione di e pratiche funerarie trà u IXu è u primu millenariu nanz' à Cristu, perchè sò dati assai scarsi è à vioti.

Però, ci vole à rimarcà chì u trattamentu di i morti cambia secondu l'epuche. E pratiche di carbunizzazione è di cremazione di i schenetri parenu caratterizà i rituali funerari di e sucietà di l'Età di i Metalli (Calcoliticu è Età di u Bronzu). In ste sucietà, i morti eranu sepelliti subbitu accantu à l'abitaculi, u più spessu in e catamalze scugliose (caos rocheux) induve s'arrebavanu dinù e case.

Sta vicinanza trà u mondu di i vivi è quellu di i morti deve esse cunsiderata cum'è un elementu primurosù di u pensamentu simbolicu è religiosu di ste pupulazioni : rispechja una rilazione privilegiata trà i vivi è l'antenati è amenta una partecipazione di st'ultimi à a vita oghjinca di e cumunità.

### **Megalitismu**

E sepulture megalitiche (stazzone è cascioni) eranu monumenti funerari particolari, forse cullettivi, aduprati trà a fine di u Neoliticu è l'Età di u Ferru da certe cumunità di l'isula. Riaduprate tante volte durante l'età preistorichi, ste sepulture sò state spurgate da u so cuntenu è forse ancu riaccunciate è trasfurmate secondu l'ideologia di e pupulazioni.

Sti riaccunciamenti successivi, durante l'Età di u Bronzu o di u Ferru, accertanu u mantenimentu di tradizioni funerarie, chì l'urigne data di a fine di u Neoliticu ma ùn hè micca detta chì e sepulture megalitiche abbianu funziunatu in listessu modu à a fine di u Neoliticu è à l'Età di u Bronzu o di u Ferru.

Tutte e sepulture megalitiche scuperte oghje ghjornu si trovanu nant' à u liturale. In sta lingua rinaghja (bande littorale), a so spartizione hè quantunque assai spara : e stazzone è i cascioni si trovanu pè u più in e zone ricche di catamalze granitiche. Tandù, si pò suppone chì e pupulazioni campendu in regioni avendu poche furmazioni granitiche, abbianu custruitu e so sepulture cullettive in altri materiali chè u granitu (per esempiu u legnu), materiali ch'ùn anu pussutu cunservassi sin' à a nostra epuca.

## **Stantare è statue-stantare**

Sì e stantare è e statue-stantare ùn sò specifiche à a Corsica, postu chì si trovanu dinù in Sardegna è in a Francia suttana, a so impurtanza face di a Corsica a prima regione mediterranea di a statuaria megalitica. Tutte ste stantare, à l'incuntrariu di quelle d'altre regioni, ùn sò mai semplici petre roze, ma petre regularizate avendu forme geometriche, è ponu dunque esse cunsiderate cum'è vere statue.

Però, certe stantare, chì a forma face pensà à a siluetta umana è chì presentanu visi, attributi vestimentari è equipamenti, sò chjamate « statue-stantare ». Ci n'hè una centinaia, spartute in modu sfarente in quasi ogni regione di l'isula, fora di l'alta muntagna.

Rializate pè u più in granitu, ma dinù in arcosu, in calcare è in matticciu (schiste), anu una grande umogeneità stilistica, illustrendu una cudificazione icunografica simile à tutti i gruppi umani di l'isula.

## **Abitaculu**

E case di u Neolicu s'arrebavanu à grosse catamalze scugliose è cumposte d'un basamentu in petre, furmatu di duie infilarate di petronculi piantati, trà quessi eranu cugnulati i pali in legnu custituendu l'ossatura di i muri. St'ultimi eranu edificati cù terre arzillose, risciumate nant'à una canniccia (clayonnage) di ghjembe intricciate. In quant'à e tittere, custrate forse nant'à intempiature in legnu, eranu fatte di stoppia (chaume) o di rami, i so interstizii eranu tuppate dinù grazia à terre arzillose. Strutture simili sò state messe in risaltu nant'à u situ d'I Calanchi (Suddacarò), datati di u IIIu millenariu, ma podassi chì e listesse tecniche di costruzione sianu digià aduprate da e pupulazioni di i millenarii anteriori.

À parte da u IIu millenariu, e cumunità di Corsica si sò date **prugressivamente** un sistemu difensivu valendu quellu di e Baleari è Sardegna è omu assiste tandu à l'affaccata di monumenti difensivi in petra : i castelli è e torre. I castelli s'organizavanu ingiru à una catamalza scugliosa è eranu cumposti u più spessu di un'accinta larga, d'una torra è di parechji « bastioni » o opere furtificate, situati in e parti di u rampalu e più sposte.

Nentr' à ste stallazioni militari, si truvava un spaziu sbarazzatu, chì pudia casu mai agruttà una pupulazione è a so soccita (cheptel), parecchie capanne è numerose strutture di pruvista di cibi (aliments). I paesi si stendianu u più spessu à u pede di i castelli è eranu prutetti dinù da una prima accinta. Avemu oghje ghjornu in Corsica una centinaìa di sti monumenti, long' à e valli è nant' à i cirondi di i spazii fertili ; n' avemu assai in u rughjone di Purtivechju è in u Sartinese.

## **Cumerciu**

Ghjuvendusi d' una pusizione geografica centrale in u Mediterraniu occidentale, e pupulazioni isulane anu praticatu uumerciu marittimu è, cusì, anu avutu à prò soiu tutte l' innuvazioni di a preistoria europea. Toccu u VIu millenariu nanz' à Cristu è e prime impiantazioni neolitiche, ci hè a circolazione di bè è materiali trà a Corsica è u cuntinente. Dunque, scaglia, ossidiana, piole in alpine è ceramiche sò regolarmente impurtate in l' isula, in listessu modu chè pè l' animali mansi (porci, capre, muntoni...). Difatti i so patrimoni genetichi testimonieghjanu ch' elli si rinnovanu senza piantà.

À u IVu millenariu, e pruduzioni ceramiche è litiche di Corsica è di Sardegna entrenu propriu in u currente dettu « chasséen » di u Neoliticu di u Punente mediterraniu è l' ussidiana sarda hè distribuita à u nordu di l' Italia, in Pruvenza, long' à a valle di u Rhône, in Languedoc, in i Pirenei è sin' à a Catalogna. Ste circulations di materie prime, di bè è di tecniche testimonieghjanu di l' impurtenza di e rete di scambiu in u Mediterraniu, è ci partecipavanu à modu attivu e cumunità di l' isule.

À a fine di u IVu millenariu, ste sucietà pruducianu sopr' à locu i primi elementi metallici d' Europa occidentale, in ramu è à l' arsenicu, accertendu cusì a so integrazione à giri di scambiu oramai stesi à a conca orientale di u Mediterraniu.

## **Pupulamenti**

Dapoi a so furmazione, à a metà di l' Epuca terziaria, a Corsica è a Sardegna ùn sò mai state addunite à u cuntinente, à dispettu di variazioni maiò di u livellu marinu. U so pupulamentu s' hè fattu per mezu di a via marittima è mostra a ghjunta di gruppi ammaestrendu abbastanza a navigazione pè percorre l' 80 chilometri chì separanu a Corsica da e coste taliane e più vicine (60 chilometri partendu da l' isula d' Elba).

E più anziane prove di a presenza umana in st'isule sò di a fine di u IXu o à principiu di l'VIIIu millenariu nanz'à Cristu. À quell'epuca, e coste sò frequentate da gruppucci di piscadori, venuti sicuramente da u liturale talianu u più vicinu. Sì ogni tantu i so seghjorni anu duratu di più, prova si n'hè a custruzione di e seppulture, pare ch'elli ùn abbianu sbuccatu nant'à una culunizzazione durevule di Corsica è Sardegna. E tentative d'impiantazione in st'isule eranu sempre poche, i gruppi ùn avendu trovu forse e cundizioni necessarie à una stallazione à longu andà.

Ghjè solu à parte da u VIu millenariu nanz'à Cristu, quandu e cumunità neolitiche sbarconu cù biade è animali mansi, chì ci fubbenu e cundizioni minime d'una culunizzazione durevule. Dapoi tandu, si stallanu paisucci in e piaghje è si mettenu in piazza vere rete di scambiu di prudutti è di materie prime trà i sfarenti gruppi di Corsica è di Sardegna. Sta culunizzazione neolitica di l'isule situate à punente di u Mediterraniu, ch'omu pò cunsiderà cum'è u primu veru pupulamentu, entre in una mossa maiò di migrazione di populi, dapoi u Livante, in u Mediterraniu sanu. Eppure, a sopravivanza di st'impiantazioni neolitiche in l'isule ùn hè micca stata asgiata è forse chì parechje abbianu avutu prublemi è fiaschi. À parte da u IVu millenariu nanz'à Cristu parenu affirmassi i tratti d'una vera sucietà isulana. St'affaccata si vede benissimo in u duminiu funerariu, cù l'apparizione d'un megalitismu originale ripresentatu à modu u più spettaculare è cumuvente da e statue-stantare.

## **A ricerca archeologica in Corsica eri è oghje**

### **L'urigini**

A preistoria cum'è scienza individualizata di a storia, hè nata à a metà di u XIXu seculu, più precisamente in u 1859. Di sicuru, l'annu mintuatu hè solu un signalamentu, una stonda induve si cunsidereghja chì a cumunità di i sapienti hà ricunnisciutu « l'alta antichità di l'omu », sbarazzendusi più o menu di a custrizione biblica chì impunia datazioni assai più recenti. L'omu hà pussutu esse cuntempuraneu di l'animali antidiluviani, animali spariti dapoi assai tempu è digià belli cunnisciuti à l'epuca. St'ultimu terzu di seculu hè una vera rivuluzione in un universu scientificu induve si cunsiderava chì nunda avia pussutu esiste nanz'à i Celti (u populu u più anzianu mintuatu in i testi pè e nostre regioni).

Or dunque, a Corsica, cum'è numerose regioni induve e tracce di e « grande civilizazioni antiche » (è in particolare rumana) sò tenive, ùn pudia tantu esse u sugettu di studiu di i sapienti nanz'à sta rivuluzione. À pocu à pocu chì a



preistoria crei à prò soiu mezi d'avvicinà a storia senza u ricorsu à i testi, omu cunnosce quantunque u passatu di l'isula.

Difatti, in i testi antichi, l'allusioni in quant'è a Corsica sò spaperse è spessu cuntradittorie. I miti antichi in leia cù l'isula ci facenu percepì u caratteru misteriosu di sta « muntagna in u mare » secondu l'anziani. Eppure, a maiò parte di e citazioni nant'è a Corsica long'è l'antichità sò pè u più militari o cumerciali ma pocu pocu etnografiche. Sì e pupulazioni di l'età classicu sò digià difficiuli à leghje in i testi, solu l'archeologia permette d'andà più luntanu in u passatu.

## **U XIXu seculu**

Ancu di grazia, a Corsica ùn hè micca spruvista di i « monumenti » bramati da « l'anticarii » di u XIXu seculu. Di sicuru, esistenu poche vistiche rumane o etrusche (Mariana è Aleria), ma altre custruzioni incuriusiscenu i sapienti : i megaliti.

Ancu quì, à modu appena cunvenziunale, si cunsidereghja ch'è a Corsica perde a so rinomina d'isula « salvatica » cù Prosper Mérimée. Cum'è in Brittagna, i megaliti sò i sugetti di parechji fantasmi, persunagi petrificati perchè anu sfidatu i dii, indiavuliti eppo cristianizati è sò ancu case di l'orchi ; li ci vulerà u tempu pè esce da e legende.

In u 1839, sia vinti anni nanzu a nascita tradiziunale di a preistoria, Mérimée hè mandatu in l'isula fendu da ispettore di i monumenti storici. Cum'ellu a ferà sin'è u 1853 nant'è una grande parte di u territoriu francese, face l'inventariu di e stazzone è stantare è sensibilizeghja i spiriti à a salvezza di i monumenti. Attribuiti à e fate è à i Celti, i monumenti megalitichi diventanu à pocu à pocu ogetti di studiu. In più, a Corsica hà da avè à prò soiu a « megalitomania » nata in Brittagna.

In u 1894, Adrien de Mortillet conta 6192 megaliti in Francia, frà quessi una vintina in Corsica. Henri du Cleuziou, famosu vulgarizadore, ne publicherà unepochi.

Durante u XIXu seculu, ci hè u sviluppu di l'archeologia cum'è scienza ogettiva : a pratica di i scavi, a passione di a classifica stabiliscenu e base di a scienza attuale. L'Europa sana face spartizioni è prova à ripiazza in u spaziu è u tempu e vistiche scuperte, ma ci vulerà à aspettà e prime datazioni à u Carboniu 14, in l'anni 1950, pè datà i megaliti armuricani sin'è u Neoliticu, sia parechji millenari nanz'è i Celti.

## **U XXu seculu**

A mossa ingagiata à a fine di u XIXu cuntinueghja à principiu di u XXu cù a moltiplicazione di l'amatori passionati, sgiò, istitutori o ecclesiastici, chì sò i primi preistorichi. Ghjè l'Età d'oru di e sucietà sapienti. Frà e più primurose, l'Associu francese pè l'avanzamentu di e scienze avia sceltu à Aiacciu pè a so XXXa sessione. Sì poche cumunicazioni toccanu veramente a Corsica, l'evenimentu hè primurosù à modu simbolicu è, in stu principiu di XXu seculu, e publicazioni crescenu sempre di più. Persunalità famose anu da esse in leia cù a preistoria corsa, Ernest Chantre o l'abbate Letteron, fundadore di a Sucietà di e scienze storiche è naturali di a Corsica.

À u listessu seculu sò nate dinù l'istituzioni, a ricerca archeologica s'organizeghja, catedre universitarie si creanu. Via, l'archeologia si professionalizeghja. In u 1939, creazione di u CNRS induve Roger Grosjean, à parte da u 1954, principia una carriera di cercadore. I so travagli cunsacreranu un'altra orientazione di a cronologia di a preistoria corsa. Difatti, ferà l'inventariu di i siti di l'isula, l'identificherà, i daterà, i paragunerà avendu u scopu d'attribuilli à populi. S'accorse u primu chì certe statue-stantare purtavanu arme. Uppunendu i populi megalitichi è turreani (custruttori di furtificazioni) hè l'autore di a famosa teuria di i « shardanes », trapassata oghje ghjornu. À sente à ella, e statue-stantare ripresentavanu invaditori purtendu a tecnologia di u metallu (e teurie spansiuniste essendu in usu à quell'epuca).

In u 1941 era creatu u serviziu di l'Antichità preistoriche è storiche, grazia à una lege traticcia reghjendu a pratica di l'archeologia nant'à u territoriu naziunale. In u 1992, a riorganizzazione di l'istituzioni piazza sott'à tutela di u Ministeru di a Cultura, nentr'à e Direzzioni regionali di l'affari culturali, i servizii regionali d'archeologia assicurendu a cunservazione è a cuurdinazione di a ricerca.

## **Oghje ghjornu**

Oramai decentralizata da una lege di u 2002, a gestione di i siti archeologici di l'isula hè assicurata da a Cullettività Territoriale di Corsica. In quant'à l'università di Corti, s'hè data un dipartimentu d'archeologia preistorica.

L'ultimi stati di a ricerca in Corsica mostranu un'apertura più grande versu u fora è a vuluntà affermata di ripiazzà l'isula nentr'à u Mediterraniu. Oramai, si tratta di ricerche pluridisciplinarie è trasfruntaliere, fatte grazia à Prugrammi cullettivi di ricerca (PCR, ACR, Interreg) è finanziati da u Ministeru di a Cultura, u CNRS, a Cullettività Territoriale o ancu l'Unione Europea. Oghje ghjornu, simu luntani da i « viaghji archeologici » di Prosper Mérimée.

## **Sta Corsica chì vene da luntanu**

Ancu s'ella hè stata frequentata da cumunità di piscadori, ci hè vultutu parechje millaie d'anni pè ottene una stallazione umana definitiva in l'isula. Una cunquista longa è difficiule dapoi a costa ligura chì s'hè fatta valè versu 5750 anni nanz' à Cristu.

Secondu Laurent-Jacques Costa, à l'omu li hè toccu à ammaestrà a navigazione pè stabilissi : « A Corsica è a Sardegna sò diventate isule milioni d'anni fà, bellu nanzu a nascita di i primi omi.

A culunizzazione di st'isule fubbe dunque un affare di navigazione ma ùn ci vole à crede chì a culunizzazione si sia fatta cù l'ammaestrera di a navigazione perchè stallassi nant' à terre luntane à mezu à l'acqua abbisogna altru chè di sapè francà u mare. Si pò fà una culunizzazione solu s'ella ci hè una vera dinamica di pupulamentu cù millaie di ghjente è ghjunghjiticci regulari. Nanzu stu fenomenu, si trattava piuttosto di frequentazioni micca abbastanza numerose ».

### **Piscadori ghjunti da l'Italia**

U studiu palesa sumiglie maiò in e tradizioni tecniche di i primi gruppi di Corsica, di Sardegna è di a sponda taliana (trà a Liguria, a Toscana, u Laziu è i siti isulani), per esempiu in quant' à l'industrie in petra zuccata. Eppo, a « Donna di Bunifaziu » hè stata sepolta secondu riti funerari di Liguria, in particolare a pusizione di a persona è u fattu ch'ella sia cuperta d'ocra durante a cerumonia funeraria. Sumiglie simili mostranu chì tutti sti gruppi spartianu e listesse ideologie è a listessa cultura. Dunque, Corsica è Sardegna fubbenu, à principiu, pupulate da l'Italia.

Pè e periode seguenti (Neoliticu) trà 6 000 è 4 000 nanz' à Cristu, avemu assai rinsignamenti, per esempiu i stili ceramichi. Ancu elli accertanu chì i primi paisani stallati in Corsica è Sardegna venianu da l'Italia. Dopu, l'affari s'intriscanu, u cumerciu s'intensifichghja in u Mediterraniu è urigini più diversificate sò accertate da l'Este (Adriaticu) è da u Punente (penisola iberica) ». À sente sta tesa, ci serebbe dunque una frequentazione scuntinua nanz' à una stallazione definitiva. L'elementi à prò di stu schema ùn mancanu : « ogni datu archeologicu testimonieghja di un'occupazione pè u più liturale di a Corsica è di a Sardegna da gruppucci numadi muovendusi assai, sfruttendu e risorse liturali è marine (cunigliulu-topu, pesci, cunchiglie). Tandù omu hà imaginatu è prupostu in u 1999 un sistemu di vita itinerante : gruppucci spiazzendusi in piroga long' à u liturale di Corsica è Sardegna pischendu di ghjornu è agruttendusi a sera in alloghji in daretu di e marine. »

Ma pè Laurent-Jacques Costa, stu modu di vita itinerante ùn corrisponde più à i risultati di l'ultime analisi tocchendu a frequenza è a stagionalità di st'occupazioni. Difatti, quesse eranu ripetute ma à modu scuntinuu, sopr'à tuttu l'estate cù periode propiu longhe d'abbandonu di i siti.

### **Pupulazioni cumercianti**

Secondu u cercadore, « pupulazioni capunanzu cumercianti si sò ghjuvate di a pusizione di l'isule in u spaziu mediterraniu pè tesse una reta di scambii è ci anu pussutu appughjassi, prusperà è sviluppassi. Stu fattu distingue e pupulazioni cumercianti da e pupulazioni di piscadori : nentru à e rete di scambii, e pupulazioni ùn sò micca scantate ».

### **Una storia di 8 000 anni fà**

A vera culunizzazione di a Corsica è di a Sardegna hè più traticcia, hà principiatu da veru versu 5 750 nanz'à Cristu quandu pupulazioni praticendu l'allevu è l'agricultura sò sbarcate da l'Italia, impurtendu biade, animali mansi (muntoni, porci...) è edificendu i primi paisoli casarecci in e piaghje alluviali. Una culunizzazione chì durò una bella stonda.

Quandu i primi omi sbarconu, 10 000 anni fà, scuprinu terre immachjite da muchji, albitri, scope è ghjinepari sin'à zone alte cù pocu salvaticume, solu qualchì ruditore (topi campagnoli, pontichi (campagnols) è un cunigliulu tamant'à un topu : u prolagus. L'altri animali (ghjire, ricci, volpi, porci è muntoni) sò stati tutti intruduti da l'omu à principiu di u Neoliticu, 8 000 anni fà. In quant'à certi porci è muntoni, sò scappati è vultati à a vita salvatica. Finalmente, sò diventati i cignali è i muvroni corsi.

### **L'affaccu d'una sucietà isulana**

« Omu hà sempre credutu chì a machja era u risultatu di una defurestazione cagiunata da l'omu ma, in fatti, st'ultima hà principiatu bellu nanzu à ellu, più o menu 12 000 anni fà, subito dopu a prima ghjacciazione, in tempu di a scaldera climatica, una scaldera accumpagnata di fochi naturali liati à i tempurali. Cum'ellu ùn ci era nimu pè spinghjeli, pianure di furesta anu brusgiatu lascendu a piazza à a machja. Cuncernendu l'usi di vita, e ricerche permettenu d'avvicinalli megliu. « I primi siti testimonieghjanu di passi di gruppucci, di frequentazioni corte corte, à u più qualchì settimana. I siti archeologici testimonieghjanu di un sfruttamentu maiò di u prolagus chì devia brullicà in e piaghje custere, essendu ellu stessu senza veri predaghji fora di i rapaci è a serpe. Avemu dinù a cunsumazione di cunchiglie è di pesci. »

L'impiantazione di e cumunità umane s'hè fatta grazia à u misticciu (métissage) di e pupulazioni è i scambii di tecniche. Durante i dui millenarii chì seguitonu a culunizzazione, trà u 5750 è u 4 000 nanz'à Cristu, sò ghjunte in l'isule sfarenti pupulazioni, venendu da l'Italia è da a Pruvenza, impurtendu senza piantà nove tradizioni tecniche è culturali. Cusì, a demugrafia cresce à più pudè in Corsica : « À parte da 4 000 nanz'à Cristu, si custatta una densità di pupulamentu maiò : più d'un paese à u km<sup>2</sup> nant'à u liturale è numerosi siti in l'alti valli di l'internu. Tandu, omu assiste à l'affaccu d'una vera sucietà isulana corsa è sarda, palisata pè u più da e so manifestazioni megalitiche è e statue-stantare. »

### **L'età d'oru di a Corsica**

A « culunizzazione » di a Corsica hà duratu parechji millenarii ma, secondu Laurent-Jacques Costa, l'isule anu avutu un età d'oru. Spiega : « cù u spiccu di u cumerciu marittimu in Mediterraniu, è in particolare di u cumerciu di i metalli, l'isule anu avutu un veru età d'oru, si trattava tandu di sucietà di palazzu, vale à dì capuralizie cù un signore in u so palazzu. N'avemu assai vistiche in Araghju, Tappa è Filitosa eppo u paese ingiru à u castellu, cumpostu d'una cinquantina d'abitazioni... ».

L'isule avianu à prò soiu u spiccu di e strade cumerciali è ne eranu tappe incuntestevuli : « Ghjeranu piccule cumunità ricche, pruspere, dinamiche, inserite in rete di scambii chì si stendianu sin'à l'Anatulia, Chypre è l'Egittu. Eppure, à principiu di l'Antichità, quandu anu spuntatu e grandi civilizazioni antiche, e strade cumerciali si sò spiazzate è l'isule si sò trove scantate, in zona periferica è anu persi a so piazza in u Mediterraniu ».

### **Nove scuperte à vene**

L'archeologia hè tocca da numerose avanzate st'ultimi anni. Sta rialità si spiega da duie evoluzioni maiò. Da una banda, l'archeologia s'hè professionnalizzata è, da l'altra banda, s'hè avvicinata di l'altre scienze è in particolare di e scienze dette « dure » (fisica è biologia). Oghje ghjornu, s'è i scavi fermanu indispensabile, e scuperte archeologiche si facenu di più in i laboratorii, durante analisi sempre di più precise. « Numerose vistiche archeologiche di Corsica sò in traccia d'esse analizzate in u mondu, per mezu di programmi cullettivi di ricerca assuciendu scientifici. Si datanu carboni di legnu, ossami in Saclay (Parigi) è in Tucson (Arizona), petre vulcaniche in Rio, denti pecurini in Munich è Washington. Dunque, si pò aspettà scuperte ancu di più primurose è numerose !

In quant'à l'archeologia corsa, ci hè un potenziale maiò in l'isula è l'archeolochi sò fieri di u travagliu compiu st'ultimi anni : difatti, oghje, e teurie sviluppate à parte da osservazioni cundutte in Corsica sò adurate pè spiegà a culunizzazione di l'altre isule mediterranee. Per esempiu, l'ultimi travagli di Jean Guilaine, chì hà a cattedra di preistoria mediterranea à u Collège de France, s'appoghjanu nant'à l'argumentariu di l'archeolochi corsi pè spiegà u pupulamentu di Chypre.

L-J Costa ricunnosce dinù chì nove avanzate di a ricerca scientifica ponu cuntestà l'acquisti d'oghje ma a forza di a dimarchja scientifica hè d'accettà ste cuntestazioni è u dibattitu.

### **A Donna di Bunifaziu**

Ghjè a più vechja Antenata di i Corsi è hè stata piazzata in u novu museu di Livia. Data di u Preneoliticu (pocu più d'8 000 anni fà) è fubbe scuperta in u 1972 da François de Lanfranchi, professore à l'università di Corti, in l'agrottu d'Araguina-Sennula.

Grazia à e misure date da u carboniu 14, si sà ch'ella campava versu l'annu 6570 nanz'à a nostra epuca è ch'ella hè morta à più o menu 35 anni. Manghjava pesci, mammiferucci caccighjati in l'ambiente di a sapara. Da giovane, s'era sicuramente ferita è ùn pudia campà sola. A so testimonianza hè veramente passiuante è porghje assai rinsignamenti nant'à e cundizioni di vita di sta perioda. Ci palesa digià dui aspetti essenziali di a tradizione isulana :

- U cultu di i morti perchè fubbe interrata secondu un cerimoniale (stinzata à corpu insù, e bracce long'à a persona, i pedi aghjunti, u capu nant'à a spalla diritta),

- A solidarietà di u gruppu : essendu svantaghjata, ùn averebbe pussutu campichjulà parechji anni senza l'aiutu custante di i so vicini.

### **U Monte Leone**

Scavatu à a metà di l'anni 1990, l'agrottu di u Monte Leone, in Bunifaziu, hè u più impurtante situ mesoliticu di u bloccu corso-sardu, per via ch'omu ci trova decine di millaie di pezzi d'osse è millaie di testimoni d'attività umane. Elementi mustrendu a successione d'occupazioni scuntinue trà u IXu è u VIIu millenariu nanz'à Cristu. Stu cantieru archeologicu direttu da Jean-Denis Vigne (direttore di ricerca à u CNRS è direttore di u laboratoriu d'anatomia à u Museum nazionale di Storia naturale di Parigi) hà addunitu numerosi specialisti di sfarenti discipline (biologisti, fisichi, archeolochi...)

Quessi anu permessu di dissutterrà (exhumer) e vistiche, ma sopr' à tuttu di restituì l'ambiente induve e cumunità preistoriche avianu evulatu è di studià u so modu di vita. Sò i risultati di st'analisi chì permessenu, pè a prima volta, di prupone l'ipotesi di frequentazioni di l'isule da « piscadori numadi custieri ». Numerosi resti di ruditori purtendu marche di digestione, mostranu ch'elli venenu da palottule di righjezzione. Dunque, u situ hà agruttatu dinù rapaci, stu fattu mostra ch'ellu hè statu abbandunatu durante periode abbastanza longhe permettendu a stallazione d'acelli.

### **A fundazione d'Aleria**

Grechi di Fucea, in Asia Minore, fubbenu i primi omi civilizzati à scopre a Corsica, benchì l'isula sia stata abitata omancu dapoi u 7u millenariu nanz' à a nostra epuca. Versu 565 nanz' à Cristu, stabilinu un fondacu (comptoir) cumerciale nant' à a costa orientale ; e ceramiche meravigliose, ch'elli busconu in i centri di fabbricazione più rinumati di u Mediterraniu, testimonieghjanu di a so prusperità. Facenu cunnosce à i so vicini Corsi, populu avendu mendi pasturali, l'esistenza di un'alta civilizzazione cù a so litteratura, i so arti è credenze.

Alalia ùn s'assumiglia à i paesi Corsi, fatti di scogli è di capanne. Infilareghja vere case long' à i carrughji è piazze disegnati da urbanisti. Importa da a Grecia anfore, cuppe è crateri. Intruduce dinù a vigna è l'ulivu in a piaghja orientale, insegna a scrittura è l'arte di salì u pesciu, sfrutta ghjamenti d'argentu, di ferru, di piombu. D'altrò, i Corsi di l'internu, rispinti in a furesta è a machja, allevanu e so capre. À i Grechi di u liturale, vendenu u mele, a cera è a rasgina (résine) : primi scambii, primi cuntatti, primi mischji.

Nant' à l'urigine d'Aleria, Hérodote, à u Vu seculu nanz' à Cristu, ci hà lasciatu un racontu cunfirmatu da i scavi. Dunque i Fuceani, Grechi d'Asia Minore, anu avutu « un rolu di prima trinca in a culunizzazione Greca di l'occidente Mediterraniu, induve Fucea fubbe a cuncurrente principale di i Feniciani eppo di Carthage. Sti Fuceani, accampati da i Persi di Cyrus, decisenu d'abbandunà a so cità è si stallonu cù moglie è figlioli in una cità chjamata à mumentu datu Alalia è induve « 20 anni nanzu avianu, à sente un oraculu, rialzatu (o alzatu ?) una cità ».

Pè falla più semplice diceremu chì a maiò parte di a culunia Fuceana si stalla in Alalia versu 540 nanz'à Cristu. Ci steranu seculi è seculi è custruiscenu una cità armuniosa, ricca, chì resisterà à e disfatte è à l'occupazioni successive sin'à a so distruzione sana, à u principiu di u Vu seculu dopu à Cristu, da i Vandali.

U pianottulu in modu di tavula, induve si trova a cità, supraneghja a piaghja è u Tavignanu da più di 65 metri. Si trova vicinu à u mare è i stagni eppo, toccu u neoliticu anzianu, ci stanu cacciadori, pastori è agricoltori. Sti gruppi anu à prò soiu una situazione eccezziunale, dunque sfruttanu e ricchezze naturali di i stagni è di u mare, di e fureste è di u fiume. À tempu praticheghjanu l'allevu è u cambiamentu di pasculu, eppo a cultura di e biade, u sfruttamentu di i minerali è u travagliu di u metallu.

Toccu u primu millenariu nanz'à Cristu, sti gruppi umani chì l'autori anziani chjamavanu i Corsi, avianu rilazioni ecunomiche cù a penisula taliana, eppo l'isule è e sfarenti regioni di u Mediterraniu. D'altronde, a pusizione di a Corsica, in core di e vie maiò di cumunicazione di l'Antichità, hà da valurizà u sviluppu di i scambii è di i cuntatti. Cusì i Fuceani anu da stallà a so culunia in Alalia (Aleria) in u 565 nanz'à Cristu, è aprenu tandu l'isula à e grande civilizazioni di u Mediterraniu.

U scavu di u situ, fattu da Jean è Laurence JEHASSE, mostra u sviluppu tamantu di a cità. Per mare ghjunghjenu e più ricche pruduzioni di Grecia, d'Italia sottana, d'Etruria è di Cartagine chì si scambianu, contr'à u legnu di l'internu, i prudutti di a terra, a cera, u mele, a pece (poix), è infine i metalli (coghju, ferru, piombu...).

Sti scambii induve ci entre a Corsica di l'internu, permetteranu à l'isulani di determinassi di pettu à u fora, ma dinù d'avenne l'influenze grazia à a scuperta di a scrittura, l'adopru di tecniche, u travagliu di u metallu, l'architettura, l'agricultura..., elementu d'un sviluppu ecunomicu è di ricchezze ch'omu ritrova in e tombe di a necropola prerumana d'Aleria. Queste presentanu numerose ceramiche assai ricche, arme, ghjuvelli, imbellimenti è mubiglia utilitare di bronzu è di ferru.

Aleria è a Corsica sò cunquistate da Cornélius Scipion in tempi di e guerre puniche in u 259 nanzu à Cristu. Si tratta di a prima cunquista rumana fora d'Italia. Oramai, l'isula hà da campà in l'aghja di Roma durante quasi ottu seculi. Dopu una cunquista difficiule chì hà da abbisugnà parechje campagne militari, Aleria diventava a capitale di a nova pruvincia.



À parte da u primu seculu nanz' à Cristu, diventa una culunia sviluppata è imbellita da Sylla eppo César è infine Auguste, chì ci stalleranu cittadini rumani, anziani militari di e legioni è li eranu attribuiti terreni. U core di a cità fubbe assestatu torna, era pruvista di rampali, un anfiteatru fubbe custruitu, è Aleria splendia sopr' à tante terre à l'ingiru è avia torna una grande prusperità.

Sta pace rumana durava quasi quattru seculi. Eppo, cù a trafalata di l'Imperu, ci eranu l'invasioni è Aleria era strutta da i Vandali à principiu di u VIu seculu dopu à Cristu. A sparizione di l'amministrazione rumana, a fine di i giri cumerciali, l'insicurezza, è sopr' à tuttu a malaria in a piaghja feranu sminticà a cità durante 1500 anni. Ogni prova di ricunquista fiascava, malgradu u passu di i Lumbardi, di i Bizantini, di i Sarracini, è a vuluntà di i Pisani, ma sopr' à tuttu di i Genuvesi chì custruianu u Forte à parte da u XIVu seculu. Ci vulerà à aspettà a seconda metà di u XXu seculu pè vede torna u sviluppu di a regione d'Aleria.

### **Mariana**

A cità antica hè stata fundata da u console è generale rumanu Caius Marius versu 100 nanz' à Cristu. Purtendu sicuramente u nome di u so fundadore, sta seconda culunia rumana dopu à Aleria hè situata à u nordu di a piaghja orientale, nant' à a cumuna attuale di Lucciana.

L'ambiente di Mariana presenta vantaghji naturali ghjuvendu à assicurà a prusperità d'una cità : un piaghjone fertile chì pò esse sfruttatu, a vicinanza di e fureste è di i stagni, a presenza d'un fiume custieru, Golu, chì l'estuariu, assai allargatu, facilitava l'accostu di e navi mercanti è permettia l'impiantazione di porti. Elementi avendu influenzatu a scelta di u locu di fundazione di Mariana. Ma ghjè sopr' à tuttu a so pusizione geostrategica chì paria esse l'elementu maestru ghjustificandu a scelta di stabili a culunia.

À livellu mediterraniu, u fattu di pussede una cità portuaria primurosa à u nordu di a Corsica permette d'ammaestrà megliu e vie marittime in u mare Tirrenu. D'altronde, à parte da 6 dopu à Cristu, Mariana diventa, cun Aleria, una di e duie base di a flotta di Misène in Corsica. À livellu isulanu, a creazione d'una seconda culunia facilitateghja u cuntrollu è a gestione di e cità di u nordu di l'isula è accelereghja a rumanizzazione di i territorii più alluntanati d'Aleria.

Da un puntu di vista archeologicu, fora di qualchì muneta di l'epuca repubblicana, e vistiche d'accunziamenti urbani cuntemporanei di a fundazione di Mariana sò sempre da scopre. Eppure, i primi culoni essendu vechji militari di e legioni, forse chì u statu primitivu di a cità sia firmatu durante una bella stonda quellu d'un campu militare rumanu edificatu in legnu.

Pè st'alte epuche, solu i testi di l'autori anziani cum'è Pomponius Mela, Pline l'Anzianu, o ancu Sénèque è Solin accertanu l'esistenza di a culunia. À i primu è secondu seculi di a nostra epuca, custruzioni in mattoni sò erette in Mariana cunservendu à tempu a trama di l'occupazioni anteriori è in particolare u sistemu viariu ortonormatu cumpostu di u Decumanus Maximus (via este-ueste) è di u Cardo Maximus (via nordu-sudu). Ghjè dinù à u IIu seculu chì a cità perde u so statutu di culunia. Oramai, hè cunsiderata cum'è una cità : una polis.

Mariana pare esse à u più altu durante u IVu seculu. E scuperte archeologiche insegnanu una circolazione monetaria intensa, fenomenu mustrendu sicuramente una grande prusperità. In sta perioda, avemu ancu u sviluppu di u cristianismu. U primu statu di l'inseme paleocristianu di a cità puderebbe esse datatu di a fine di u IVu o di u principiu di u Vu seculu. Dopu, l'agglomerazione agrotta una di e sede episcopali di l'isula. Tandù, Mariana hè a cità isulana di l'Antichità tardiva, preputenza ch'ella si tene in u filu di l'altu Midievu.

Durante una stundetta, paria secundaria di pettu à Aleria, capitale di a Corsica rumana, ma Mariana averà campatu megliu chè a so vicina a fine di l'Imperu. Dà ancu l'impressione di rimpiazzalla dopu a distruzione di quessa versu 420. Sta pusizione supranante hè cunfirmata da i testi di i geografi di l'epuca perchè Mariana hè a sola cità isulana mintuata à u VIu seculu da a « Table de Peutinger » è, à u VIIu seculu, u testu di « l'Anonyme de Ravenne » a mette in prima piazza di e cità di l'isula.

Eppuru, cum'è e cità custiere di u tempu, Mariana hè tocca ancu ella da l'invasioni è e distruzioni. I Vandali, i Bizantini, i Lombardi è i Sarracini parenu seguitassi trà a seconda metà di u Vu è u Xu seculu. Durante l'XIu seculu, e flotte taliane scartanu definitivamente a minaccia sarracina da u mare Tirrenu.

I Pisani s'imponenu ufficialmente in Corsica à parte da u 1077 è a Chjesa pisana riorganizeghja e strutture ecclesiastiche isulane. À principiu di u XIIu seculu, a catedrale rumana di Mariana hè eretta vicinu à e ruvine di a basilica paleocristiana. Ma a custruzione di u palazzu episcopale ùn basta à rinvivì una cità annientata à pocu à pocu da seculi d'insicurezza è situata in una zona oramai malsana.

U situ hè abbandunatu definitivamente à a fine di u XIIIu seculu quandu u vescu decide di fà trasferì a so residenza in u paese di U Viscuvatu. Tandù, u locu pussede solu un valore simbolicu in particolare pè i signori filoaragunesi di l'Aldilà di i Monti (Pumonte) chì venenu à facci eleghje conti di Corsica durante u bassu Midievu.

## **Siti di u Mesoliticu**

### **Araguina-Sennula**

Si tratta d'un agrottu aprendusi in tippali (falaises) calcari à a punta suttana di a Corsica, à più o menu 200 metri da u lidu attuale. Scupertu in u 1966, hè statu scavatu trà u 1969 è u 1972, eppo in u 1975 è u 1976 da F. de Lanfranchi è M.-C. Weiss. I scavi anu toccu solu una piccula parte di l'agrottu, u restu essendu statu struttu da travagli di scassu (terrassement), chì fubbenu à l'urigne di a scuperta di u situ.

A sgrumbulera di e tramizane (parois) calcari di l'agrottu hà permessu u sutterrà rapidu di i fundigli (dépôts) è a so cunservazione, furmendu un empime zeppu di più di sei metri, chì mustrò un'infilata di frequentazioni scuntinue dapoi u Mesoliticu (VIIIu millenariu) sin'à l'Età di u Bronzu (Primu millenariu). In stu situ ramintemu ch'ella hè stata trova a « Donna di Bunifaziu », u più vechju schenetru umanu mai scupertu in l'isula.

### **Curachjaghju (Livia)**

Situatu in una valle interna, à 850 metri d'altitudine, st'agrottu sott'à tittoghja (auvent) fubbe viutatu di u so cuntenutu sedimentariu da u pruprietariu di u terrenu in u 1966. I scavi cundutti da F. de Lanfranchi, trà u 1967 è u 1975, cuncernavanu a zona situata davant'à l'agrottu, nant'à qualchì metru quadratu. Ancu s'elli sò stati assai vultulati da l'erusione è da i travagli antropichi, i strati archeologichi scupertu anu permessu d'identificà parecche periode d'occupazione di l'agrottu, à u Mesoliticu è à u Neoliticu.

### **Gritulu (Luri)**

A sapara di Gritulu s'apre in fondu à un tippale calcare, à 150 metri d'altitudine. Hè situata à l'entre di a valle di Luri, à quasi 2,5 chilometri da u lidu attuale. Si tratta d'un canale stendendosi nant'à più di 10 metri di longu è 2 o 3 metri di largu. I scavi cundutti trà u 1993 è u 1998 da J. Magdeleine è J.-D. Vigne anu sbuccatu nant'à una longa sequenza stratigrafica stendendosi dapoi l'Alleröd sin'à u Subboreale. Disgraziosamente, a risarcita (remise en fonction) di a reta carstica, sicuramente durante u Midievu, hà spurgatu una bella parte di u sedimentu di a sapara. I strati mesolitichi è neolitichi sò stati cunservati solu sott'à a forma di rivestimenti sedimentari inziccati (brêchifiés), sugellati (scellés) sott'à una funtana stalamitica.

## **Monte Leone (Bunifaziu)**

Scupertu in u 1991 da F. de Lanfranchi è J.-D. Vigne, stu situ hè statu scavatu in u 1995, da J.-D. Vigne, nant' à una stesa di 19 m<sup>2</sup>. Ghjè un agrottu maiò situatu oghje ghjornu à più o menu 1 kilometru da u mare, aprendusi in fondu à un picculu tippale calcare à 56 metri d'altitudine. Sottu à numerosi riempiimenti (remblais) venendu da u sfundamentu d'una parte di l'agrottu, i scavadori anu scupertu un'infilarata di strati mesolitichi furmendu una stratigrafia di quasi un metru di zeppura à un capu di a zona scavata. In u situ, ci sò i resti di duie strutture di cumbustione, quasi 1200 vistiche litiche è tanti altri resti.

## **Strette (Barbagju)**

L'agrottu di Strette, lucalizatu nant' à un tippale di mulacci (molasses) mioceni, s'apre à l'arice di u fiume A Strutta, in un calancone liendu u golfu di San Fiurenu à a piaghja di U Poghju d'Oletta. À principiu di l'anni 1980, J. Magdeleine è J.-C. Ottaviani ci anu cunduttu scavi di salvamentu, una spallitrice (pelleteuse) avendu struttu in parte i livelli archeologici. Una longa sequenza stratigrafica, sparghendusi da u Mesoliticu à l'Età di u Ferru hè stata scupertu. Si trattava d'una mansa di strati fini, riprisentendu ognunu una o parechje occupazioni corte, forse liate à a spluttazione di u liturale vicinu.

## **Torre d'Aquila (Petracurbara)**

Agruttucciu situatu nant' à una culletta, à a foce d'una valle stretta, à l'arice di u lidu. Scavatu da J. Magdeleine in u 1986 è u 1987, stu situ cuntene parechji strati archeologici, frà quessi una sepultura di u Mesoliticu è parechje strutture di pruvista di u Neoliticu anzianu.

## **Siti di u Neoliticu anzianu (VIu millenariu)**

### **A Petra (L'Isula Rossa)**

Lucalizatu nant' à a penisuluccia di L'Isula Rossa, A Petra occupa un terrazzolu à l'arice di u mare, à l'appossu di venti di punente, ogni tantu suffiendu à più pudè. Sta pusizione hè assai liturale è sposta à e timpeste inverninche. Scavatu nant' à 26 m<sup>2</sup> da M.-C. Weiss trà u 1983 è u 1988, u situ hà mustratu quattru strati archeologici avendu ognunu resti di strutture è palisendu un'occupazione longa di u locu durante u Neoliticu anzianu (VIu millenariu). Eppuru, tenendu à contu a situazione liturale di u situ, i livelli archeologici puderanu risultà sicuramente d'una successione d'occupazioni di stagione.

## **A Revellata (Revellata 1, Calvi)**

Un'arretta di pesca di u Neoliticu anzianu.

Situatu nant' à una penisula à qualchì decina di metri d'una cala à l'appossu, u situ hè statu scavatu nant' à 36 m<sup>2</sup> da P. Neuville trà u 1989 è u 1993. I strati identificati durante u scavu cuntenu una mubiglia assai para, fendu avventà una durata totale d'occupazione abbastanza corta, à a fine di u Neoliticu anzianu. Quattru fondi di capanili (huttes) legeri, di forma subcirculari da 2,5 à 3 metri di diametru è impetrati di cote (galets) sciappate è di petricelle, sò stati identificati. St'occupazione era sicuramente mutivata da u sfruttamentu di u liturale è da a pesca.

## **Basi (Serra di Ferru)**

U situ occupa un terrazzolu nant' à un capanile situatu à quasi 6 chilometri da u lidu attuale, in a valle di u Taravu, è appena scantatu da a piaghja furmata da l'anzianu delta di u fiume è assiccata oghje ghjornu. Basi hè statu scupertu durante a messa in a cava (carière) d'un grande caos graniticu presentendu parechje cavità. Assai dannighjatu da u travagliu di i cavapetre, hè statu scavatu trà u 1969 è u 1971 da G. Bailloud nant' à più o menu 13 m<sup>2</sup> in a zona a più minacciata, à u sudu di a cava.

Sette livelli sò stati ricunnisciuti, ripresentendu una successione d'occupazioni dapoi u Neoliticu anzianu sin' à l'Età di u Bronzu. Si tratta di una di e più primurose stratigrafie di l'isula, chì avia permessu a definizione di e principali « culture » preistoriche di Corsica, à principiu di l'anni 1970. In cima, i resti d'un Castellu di l'Età di u Bronzu, sparitu oghje ghjornu, eranu stati identificati dinù.

## **Filitosa (Suddacarò)**

U situ si trova in a valle di u Taravu, à 2 chilometri da Basi è à quasi 8 chilometri da u lidu. Ci truvemu un Castellu di l'Età di u Bronzu, scavatu da R. Grosjean à a fine di l'anni 1950, è frammenti di statue-stantare impiegati torna cum'è elementi di muratura in i rampali di u Castellu. In un campu vicinu, parechje statue-stantare, raccolte in i circondi, sò state edificate da u pruprietariu di u situ, chì hà fattu di u locu un parcu d'attrazzioni apertu à u publicu.

Vicinu à u Castellu, un agrottu mudestu, scavatu in l'anni 1960 da E. Atzeni, cuntenua mubiglia di u Neoliticu anzianu cardiale è appinzunatu. Sta mubiglia hè sposta in u museu di u situ.

## **Renaghju (Sartè)**

U situ si trova à 3 chilometri da u lidu u più vicinu, à l'arice di u pianottulu di Cauria, à a limita d'una zona assai fertile è adatta, casu mai, à l'attività agropasturali. Avemu trè infilarate di stantare è resti d'una sepultura megalitica. St'ultima, situata à una di e punte di l'infilarate, hè strutta sana è si presenta per mezu di frammenti di teghje fine è lisce, spargugliate ingiru à una fossa. Parechji sundagi, rializati in sfarenti lochi di u situ da R. Grosjean è G. Peretti in u 1964 è u 1975, anu sbuccatu nant'à una mubiglia archeologica spara, induve ci era qualchì piattinu (tesson) ceramicu è 69 pezze litiche, venendu da strati situati sott'à l'impiantazione di e stantare è di a sepultura. Sì a magiurità di e pezze hè sicuramente di u Neoliticu anzianu, certe mostranu fase più recenti, in particolare a maiò parte di e vistiche in petraculu (quartz) è in ussidiana. Eppure, i sundagi di l'anni 1964 è 1975 ùn permettenu di scantà ste sfarenti fase, tutti i trè strati identificati avendu furnitu aghjunghjiture (assemblages) rimanighjate. Ci vole à dì chì u situ hè traversatu da una surgente è quessa hà cuntrariatu i strati archeologichi in u locu di i sundagi, l'erusione di i piattini trovi palisendu stu fattu. À ste rimanighjate naturali s'aghjustanu quelle cagiunate da l'impiantazione di i megaliti, sicuramente à a fine di u Neoliticu. I scavi recenti cundutti da André d'Anna anu cunfirmatu l'esistenza di ste sfarenti fase d'occupazione è permessu a culletta di più di 1500 vistiche, frà quesse a magiurità rimanda à e pruduzioni di u Neoliticu anzianu. À qualchì decina di metri da custì, si trova un caos graniticu maiò cuntenuendu parechji agrotti abbastanza grandi pè ghjuvà d'abitaculu.

## **Southwell (Vivariu)**

A sapara Southwell si situeghja à 930 metri d'altitudine, à u pede di u Monte d'Oru, in un settore di pendita debule, à l'arice di una vadina. In sta sapara, si scopre un spaziu di menu di 20 m<sup>2</sup>, ma forse chì strutture legere li sianu state aghjunte pè furnà un insemi campatoghju più grande. Fubbe viutata di u so cuntenuutu à a fine di u XIXu seculu da Forsyth-Major è e pezze archeologiche raccolte sò state spargugliate. Cunsiderendu i sfarenti inventarii stabiliti, pudimu cunclude chì l'agrottu era statu occupatu durante duie periode neolitiche distinte è luntane in u tempu, à u VIu millenariu è à u IIIu millenariu.

U museu di preistoria di Sartè si tene dinù qualchì pezza litica esciuta da e raccolte fatte da u patre Doazan in i sbrei (déblais) di i scavi di Forsyth-Major. Sta mubiglia cuntene 27 punte di frezza, sicuramente di a fine di u Neoliticu, 28 frammenti di lame appezzate cù una percussione indiretta è 98 armature taglianti propiu specifiche à u Neoliticu anzianu cardiale è appinzunatu.

## **Siti di u Neolicu mezanu (Vu millenariu)**

### **U Ficu (Sartè)**

U Ficu hè un agrottu lucalizatu à u sudueste di a Corsica, in un caos scugliosu di a punta di Murtuli, à una centinaia di metri da u lidu. Ci fubbe un scavu di salvamentu cunduttu da A. Pasquet in u 1987. Avemu quì una piccula cavità di più o menu 8 m<sup>2</sup> presentendu un empiime zeppu di circa 50 cm, suddivisatu in trè strati distinti. U primu, attribuitu à l'Età di u Bronzu, presenta numerose testimonianze di scunvugliamenti liati à l'erusione naturale è à perturbazioni antropiche. U secondu hè propiu sterile è sugella u stratu 3 nant'à a superficie sana di l'agrottu. U terzu hà mustratu numerose vistiche sparte ingiru à un fucone, testimoniendu di a frequentazione di l'agrottu, à u Vu millenariu, da unu o numerosi gruppucci sfruttendu in particolare risorse marittime (cunchiglie è pesci).

### **Monte Revincu (Santu Petru di Tenda)**

Scupertu à a fine di u XIXu seculu da A. de Mortillet, u situ hè lucalizatu à l'entre di l'Agriate, nant'à una piccula serra, in una piaghja liturale situata à più o menu 2 chilometri da u golfu di San Fiurengu. Scavatu dapoi u 1996 da F. Leandri, ci scuprimu più di 30 strutture in petre, frà quesse parechji monumenti funerari megalitichi (duie stazzone è omancu sei cascioni) è 29 strutture rettangolari, da 20 à 50 m<sup>2</sup>, cumposte di teghje piantate di cantu è serebbenu resti d'abitaculi.

I scavi di ste strutture anu sbuccatu nant'à un stratu archeologicu unicu, pocu zeppu è ùn avendu tante vistiche, stendendusi nant'à più di 10 000 m<sup>2</sup> trà l'affiuramenti scugliosi. L'erusione di a serra hè assai primurosa è l'empiime sedimentologicu ùn franca 40 cm di zeppura.

A leia trà e vistiche è i monumenti ùn hè ancu stabilita per via d'una preservazione pessima di i sedimenti. Eppure, l'analisi di a mubiglia hà mustratu pruduzioni litiche è ceramiche assai pare, un fattu cunfirmatu da a cuerenza di e datazioni ottenute nant'à carboni ricacciati in sfarenti lochi di u situ, nentru o fora di e strutture. E vistiche litiche ripresentanu i resti d'attività di pruduzione (catene operatorie di spizzera) è di cunsumazione (righjetti d'arnesi frusti è appezzati) è ponu esse assimilate di sicuru à righjetti d'attività casarecce ; stu fattu rinforza l'ipotesi d'un abitaculu presente nant'à a serra sana.

E duie stazzone anu patutu mudifiche primurose, liate in particolare à u so adopru cum'è stazzu. Eppure, i scavi anu accertatu ch'elle eranu state edificate à u centru d'aghje impetrate è circolari, avendu una decina di metri di diametru.

Parechji cascioni sò stati scupertu dinù à mezu à aghje simuli. Altri ùn anu struttura appiccicata. Frà st'ultimi, i cascioni A è B anu mustratu durante i scavi una strutturazione interna, chì suggerisce una cumpartimentera di a so camera funeraria.

### **Presa-Tusiu (Altaghjè)**

Si tratta d'un grande abitaculu, lucalizatu nant'à un pianottulu à l'arice di un'alta valle à 750 metri d'altitudine è à più di 12 chilometri da u lidu u più vicinu. Scavatu da F. de Lanfranchi, u situ si stende nant'à parechji terrazzoli è cuntene i resti d'un Castellucciu di l'Età di u Bronzu è di numerose strutture rettangolari furmate di murucci in petre secche è di qualchì teghja piantata di cantu. E datazioni ottenute parlanu di un'occupazione, forse scuntinua, stendendusi trà u Vu è u primu millenariu nanz'à Cristu.

### **Siti di u Neoliticu mezanu (quartu millenariu)**

#### **Monte Grossu (Biguglia)**

Scavatu trà u 1968 è u 1976 da J. Magdeleine, u situ di u Monte Grossu si trova in un pughjolu à l'arice di u stagnu di Biguglia, à l'entre di u Lancone. Parechji sundagi rializati nant'à e sfarenti terrazze furmendu u situ anu fattu scopre strutture d'abitaculu è quantità primurose di vistiche ceramiche è litiche cuntenuendu materiale di macineria è arnesi di percussione in petra allisciata. A ceramica venendu da i strati III, IV è V hà e caratteristiche generali di e pruduzioni di u IVu millenariu quand'omu feghja a forma di certi vasetti, a tessitura di a pasta, i trattamenti di stesa è qualchì decoru.

À tempu, u materiale liticu, cumpostu pè u più di prudutti laminari in ussidiana, hè listessu chè quellu di l'altri siti di u IVu millenariu (Basi in particolare). I strati I è II cuntenuanu pochi elementi presentendu caratteristiche cumune cù l'industrie di a fine di u IIIu millenariu o di u principiu di u IIu millenariu.

### **Siti di u Neoliticu finale (terzu millenariu)**

#### **A mutula (Belgudè)**

U situ occupa un poghju di 261 metri d'altitudine in a piaghja di u fiume Reginu. Cunnisciutu dapoi u XIXu seculu da i cullezziunadori è mintuatu in u 1911 da l'abbate Letteron, hà datu quantità primurose di punte di frezza è di piattini ceramichi, datati di u IIIu millenariu, è un inventariu ne fubbe fattu in u 1984 da S. Goedert.



## **Cauria XX-XXI (Sartè)**

Si tratta di dui agruttucci sott' à petra, lualizati à u pede di a Punta di u Grecu chì supraneghja u pianottulu di Cauria. L'agrotti di Cauria XX è XXI sò stati scavati da P. Nebbia è J.-C. Ottaviani in u 1986 è u 1987. Ogni agrottu cuntenea i resti di sepulture è una quantità primurosa di vistiche ceramiche è litiche chì sò pruduzioni di u terzu millenariu. E vistiche si trovavanu à bulegghju, mustrendu chì l'agrotti eranu aduprati dinù cum'è sepultura. Numerosi piattini fubbenu raccolti trà i dui agrotti, luntani di 4 metri. Sia ch'ella sia, a mubiglia archeologica currisponde à i righjetti di l'abitaculu calcoliticu, identificatu nant' à a terrazza sopr' à l'agrotti.

## **I Calanchi / Sapar'Alta (Suddacarò)**

I Calanchi occupanu una culletta supranendu a piaghja di u Taravu, à più o menu 4 chilometri da u lidu. Stendendusi nant' à una superficie di 7 ettare, u situ hè statu cumpartmentatu in parechje zone chì e principali currispondenu à a parte in cima lualizata à punente (Età di u Bronzu), à a terrazza nordu è à l'agrottu di Sapar'Alta (IIIu millenariu). Ste duie ultime zone sò situate fiancu à fiancu nant' à a parte nordu di a culletta è cuncoglienu parechji tufoni funerari è strutture d'abitaculi, datati di u terzu millenariu. U settore di a terrazza nordu hè scavatu da J. Cesari dapoi u principiu di l'anni 1980 è l'agrottu di Sapar'Alta da G. Tanda dapoi u 1991.

A parte in cima agrotta un abitaculu furtificatu di l'Età di u Bronzu, presentendu i resti d'un Castellu assai apparinatu. Stu monumentu cuncuglia à principiu un'accinta larga di quasi 150 metri di longu, omancu dui bastioni è una Torre. Quessa, situata in a muraglia opposta à i bastioni, assicurava u cuntrollu di a valle bassa di u Taravu sin' à a foce di u fiume.

A terrazza nordu hà fattu scopre l'apparinere di muri larghi posti trà e masse scugliose, furmendu trè rettanguli incastrati. Ripresentanu i resti di un'abitazione chì a superficie hè stata diminuita parechje volte, da più di 60 m<sup>2</sup> à menu di 30 m<sup>2</sup>. Pè u più ste riduzioni di superficie sò state ottenute cù una diminuzione di a larghezza di u casamentu, fendu varià u muru suttanu. St'apparinere sò state cuperte da alluviunamenti ricchi di materiali archeologici, venendu da terrazze situate propiu di sopra è cuntenuendu elle dinù strutture archeologiche. A mubiglia studiata hè assai para è data di a fine di u IIIu o di u principiu di u IIu millenariu.

L'agrottu di Sapar'Alta hè una struttura d'abitazione, custruita in un caos graniticu cuntenuendu un grande tufone. Quessa si stende nant' à quasi 100 m<sup>2</sup>. I scavi anu sbuccatu nant' à una stratigrafia longa, induve i livelli « terriniani » si sopraponenu nant' à più d'un metru di zeppura.

Però, sti livelli sò menu ricchi in materiale chè i strati di a terrazza nordu, perchè currispondenu à terre intrattenute cuntenuendu numerosi piattini ceramichi assai appezzati (per via di calpighjere) è pochi elementi litichi, solu vistiche chjuche chjuche.

### **Monte Lazzu (Tiuccia)**

U situ occupa una culletta bassa (100 metri d'altitudine) à l'arice di u golfu di Sagone. Picculi sundagi (superficie tutale : 7 m<sup>2</sup>) anu scupertu numerose vistiche di u IIIu millenariu. Durante u sundagiu E (1 m<sup>2</sup>), fubbe scupertu à u cuntattu di l'arena granitica, un stratu cuntenuendu mubiglia rimandendu à tempu à e pruduzioni di u IVu millenariu (ceramica fina, nera è lustrata) è à quelle di u IIIu millenariu (ceramica « terriniana »). In u situ sò state trove dinù numerose macine (meules) è bacili (cuvettes) scavati nant'à scogli.

### **Terrina IV (Aleria)**

Si tratta d'una fossa-ghjettatoghju, impiantata nant'à un pughjolu (butte) lucalizatu vicinu à u stagnu d'acqua salita di Diana, à menu di 2 chilometri da u lidu attuale. Scavata nant'à una quindicina di m<sup>2</sup> da G. Camps trà u 1975 è u 1981, a fossa hè stata suddivisata in quattru strati cuntenuendu vistiche assai pare è permettendu datazioni propiu avvicinate ; stu fattu suggerisce un riempimentu bellu rapidu. A fossa era cuperta d'una falda (nappe) di sedimentu riccu di vistiche archeologiche, stendendusi «in aureula ingiru à ella » (Camps (dir.) 1988, p.54). A dispusizione di sta falda è a topografia di u settore suggeriscenu chè l'abitaculu era situatu nant'à un rimpianucciu (petit replat), sopr'à a fossa. Quessa hà sicuramente ghjuvatu di ghjettatoghju d'ogni specia di mullizzu.

E vistiche mostranu attività varie : allevu, agricultura (macine, materiale di pistera (broyage), arnesi di percussione in petra allisciata), metallurgia : scaghjaroli (creusets) è scorie, cunfezzione di testili (fusaghjole), culletta d'ostrici è pesca veranile di spezie lagunarie in piccule prufundezze.

### **Età di u Bronzu (IIu millenariu)**

#### **Alo Bisughje (Bilia)**

Si tratta d'un Castellu di l'Età di u Bronzu, lucalizatu nant'à un anzianu chjassu andendu da u pianottulu di Grossa à a valle di u Rizzanese. Si cumpone d'una Torra sfundata, d'una decina di capanne delimitate da murucci è d'un muraglione, chè una parte esiste sempre è chè cinghjia l'inseme. Dui framenti di statue-stantare sò stati scupertu dinù nant'à stu situ.

### **Araghju (San Gavinu di Carbini)**

Ghjè una vera furtezza, i muri d'accinta sò cunservati in certi lochi nant'à quasi 4 metri d'altezza è più di 2 metri di largu. Scavate à a fine di l'anni 1960 da R. Grosjean, ste stallazioni militari sò edificate nant'à un pinzu scugliosu, à 245 metri d'altitudine, è supraneghjanu u golfu di Purtivechju. Avemu quì un'accinta larga, 2 bastioni inquadrendu l'entrata principale è resti d'una Torra. L'entrata principale hè prulungata da un curridò strettu d'una decina di metri di longu, chì sbocca nant'à una pezzuccia nentr'à l'accinta, forse una sala di guardia. À mezu à u curridò, una specia di capannichja (guérite) curava l'accessu.

Sopra, un chjassu di giratundu nant'à u rampale. Di pettu à l'entrata, una Torra s'alzava parechji metri sopr'à stu chjassu. Nentru, si trovanu una pezza di 15 m<sup>2</sup> è dui diverticuli chì permettianu di cullà à i piani suprani, oghje spariti. À u centru di a furtezza, una corte interna hà una superficie di quasi 450 m<sup>2</sup>. Paria ch'ella ghjuvessi di ricoveru pè e pupulazioni è e so soccide (cheptels) s'elli ci eranu assalti. Casamatte, custrate in a muraglia vicinu à l'entrata di u situ, si ponu vede dinù. I so scavi anu fattu truvà vistiche d'attività oghjinche, arnesi di macineria, fuconi è elementi di pruvista di manghjusca, fendu avventà a presenza regolare d'una guarnigione.

### **Calzola-Castellucciu (Pila Canale)**

À l'esciuta di u paese di Pila Canale, nant'à a culletta di Castellucciu, un bellu muru d'accinta prutegge un edificiu maiò, di pianu elitticu, è un insemi d'abitazioni cumpostu di strutture rettangolarie appicciate. St'insemi furtificatu fubbe occupatu trà u principiu di u secondu millenariu (Età di u Bronzu anzianu) è u principiu di u primu millenariu (Primu Età di u Ferru).

### **Castellu di Puzzonu (Sartè)**

Lucalizatu nant'à a culletta supranendu u liceu agriculu di Sartè, à l'arice di u fiume Rizzanese, u situ cuntene un Castellu di l'Età di u Bronzu è strutture d'abitaculu, prutette da parechji muri d'accinta. U situ hè famosu perchè omu hà scupertu in particolare, durante i scavi, una forma (moule) magnifica di pugnale (poignard), accertendu a fabricazione d'arme nant'à u situ. Stu pugnale hà una mela (pommeau) in meza luna, propiu simile à quelle di e statue-stantare di Corsica.

### **Ceccia (Purtivechju)**

Sta Torra si trova nant' à un pinzu scugliosu chì supraneghja a piaghja à u sudu di Purtivechju. A parte cunservata hè un cilindru irregulare induve si trova una sala circolare di 2 metri di diametru, cù una volta in cacciafora falsu (faux encorbellement). A camera versu u livante cuntinueghja per mezu di un diverticulu ghjunghjendu sin' à l'ornamentu di u monumentu. Omu entre in sta camera grazia à una ringhera partendu da a piattaforma suprana, chì era, à principiu, u puntellu d'altre strutture. Di quesse ne ferma solu qualchì vistica di muri. Stu monumentu, cunservatu solu in a parte bassa, hà avutu rimanighjate primurose à l'epuca genuese.

### **Contorba (Ulmetu)**

Stu Castellu di l'Età di u Bronzu supraneghja u golfu di u Valincu, sopr' à u locu dettu Scoddi Neri. Hè furmatu cù una muraglia in petronculi di granitu, delimitendu un spaziu circolare. À mezu à stu spaziu ci hè un monumentu turriformu, cumpostu di duie pezzucce. Nentru, si pò vede un macinone.

### **Cucuruzzu (Livia)**

Lucalizatu nant' à u pianottulu di Livia, à 700 metri d'altitudine, stu Castellu di l'Età di u Bronzu hè statu assestatu in un grande caos scugliosu. Si tratta di un'accinta di petronculi, delimitendu una superficie circolare è una Torra, avendu sempre una parte di a so tittera, fatta di teghjoni posti in cacciafora falsu (vale à dì chì ogni teghjone pone in parte nant' à un altru). In fondu di stu Castellu si stendia u paisolu protostoricu. Accantu si trova u Castellu midievale di Capula è una bellissima statua-stantara (statua-stantara di Capula).

### **Filitosa (Suddacarò)**

U situ si trova in a valle di u Taravu, à 2 chilometri da Basi è à quasi 8 chilometri da u lidu. Ci truvemu un Castellu di l'Età di u Bronzu, scavatu da R. Grosjean à a fine di l'anni 1950, è frammenti di statue-stantare fendu oramai da elementi di muratura in i rampali di u Castellu. In un campu vicinu, parecchje statue-stantare, cullettate in i cirondi, sò state edificate da u pruprietariu di u situ. Accant' à u Castellu, un agrottu mudestu scavatu in l'anni 1960 da E. Atzeni, hà datu mubiglia pudendu appartene à e pruduzioni di u Neolicu anzianu cardiale è appinzunatu. Sta mubiglia hè posta in u museu di u situ.

### **Foce (Arghjusta Muricciu)**

Ferma solu a parte bassa di a Torra, chì u diametru hè vicinu à 18 metri. Avia un'entrata à u sudu, dui curridò laterali, frà quessi unu permettia di cullà à i livelli suprani eppo una sala centrale, di pianu circolare, forse inzimbata (voûtée) in cacciafora falsu. Sta sala sbuccava, à u nordu, à livante è à punente, nant'à trè nichjucce custrate in a zeppura di u muru.

### **Rusumini (Castineta)**

Si tratta di i resti d'un castellu di l'Età di u Bronzu, chì fubbe scavatu in l'anni 1980 da J. Magdeleine è J.-C. Ottaviani. Stu situ furtificatu, assai apparinatu, presenta i resti d'un rampalu è di 2 turrucce, assumigliendosi abbastanza à quelle di i monumenti di u sudu di a Corsica.

### **Tappa (Purtivechju)**

Stallatu nant'à un pughjolu induve si pò ghjunghje abbastanza faciule, st'edifiziu era sicuramente unu di i più primurosi di Corsica. Una reta di muraglioni, assai apparinati oghje ghjornu, prutegia u paese chì si stendia in fondu à u Castellu. Omu ghjunghja à st'ultimu da un scalone strettu, sparitu oramai, accunziatu in a zeppura di i muri. D'altrò, u monumentu hà sempre una parte di a so accinta è una Torra, nant'à e 2 o 3 ch'ellu avia à principiu. Sta Torra hà un pianu abbastanza intrisicatu per via di numerosi curridò secundari, frà quessi dui vanu versu esciute piate. Eppo, truvemu i primi scalini à lumaca pè cullà à u pianu supranu.

### **Torre (Purtivechju)**

Stu monumentu hè in cima d'un pughjolu liturale chì supraneghja u paisolu di Torre. Si tratta d'una custruzione mezu circolare, appiccata à un scogliu tamantu. Ùn ci hè camera in a parte cunservata, ma avemu un curridò è dui diverticuli. In fondu à u curridò, un cunduttu d'aerazione, chì si pò sempre vede, permettia d'evacuà u fume. Teghjoni coprenu u curridò è i diverticuli. A parte suprana di u monumentu, induve si sbuccava per mezu di un scalone, ùn hè stata cunservata. Da a Strada Naziunale 198, si pò ghjunghje faciule nant'à stu situ.

## **Megalitismu (Stazzone è bancali funerari)**

### **Bizzicu Rossu (Grossa)**

Sta stazzona hè situata nant' à un pughjolu supranendu a piaghja di Vaccili-Vechju. Signalata in u 1893 da A. de Mortillet, hè cumposta oghje ghjornu di dui ortostati è di una teghja di tittera in granitu. L'assenza di teghja di capizzale (dalle de chevet) hè forse u risultatu d'una sgradazione di u monumentu originale. A so altezza avvicina 1 m 60 è a so camera hà una superficie di quasi 2 m<sup>2</sup>. À qualchì metru da a camera, si trova un stantarone (grand menhir).

### **Capu di Bonu (Bisinchi)**

À e cunfine di a Castagniccia, vicinu à u paese di Bisinchi, dui bancali, cunnisciuti dappoi una bella stonda, sò stati scavati à principiu di l'anni 1990 da J. Magdeleine. Sti bancali, custituiti di longhe teghje di matticciu, eranu stati messi à l'abbottu (pillés) è, à principiu, si truvavanu sicuramente sott' à cullettule di chjappe accatamalzate (sous des tertres de pierres plates empilées). I so scavi anu fattu truvà mubiglia rumana di u primu seculu dopu à Cristu, frà quessa un bellu intagliu in curnalina ripresentendu a dea Fortune.

### **Cardiccia (Sartè)**

Cunnisciutu toccu u principiu di u XXu seculu è situatu nant' à u pianottulu di Cauria, à più di 6 chilometri da u lidu, u situ cuncoglie una stazzona assai dannighjata è quattru bancali megalitichi. A stazzona, induve fermanu 2 muntenti è un framentu di teghja di tittera, fubbe scavata da P. Nebbia è J.-C. Ottaviani in u 1981. Dui settori scavati : nentr' à a camera è fora, longu à l'ortostati. Numerose vistiche litiche fubbenu scuperte, à livellu di a camera (371 pezze) è fora (419 pezze). U studiu di a mubiglia ùn mostra sfarenze trà e pezze venendu da u nentru o da u fora di u monumentu, ch'ella sia à livellu di e materie prime sfruttate o à livellu di e mudalità di pruduzione.

Si tratta di resti di putera è d'arnesi abbandunati dopu esse stati aduprati, venendu da un stratu archeologicu dilatatu, presente da u pianu sin' à l'arena granitica à 80 cm di prufundezza è assai scunvultu da l'impiantazione di a stazzona. Stu stratu, truvendusi nant' à u settore sanu, esistia sicuramente nanz' à a custruzione di u megalitu. A mubiglia scuperta hè assai para è hà e caratteristiche di e pruduzioni di u IVu millenariu.

### **Ciutulaghja (Appiettu)**

Monumentu lucalizatu vicinu à a cima di u Monte Sant'Anghjulu, sopr'à u golfu di Lava. Cunservatu in parte, stu megalitu era à principiu un cascione o una stazzona mezu interrati, cinti di un'aghja impetrata di 10 metri di diametru. Da a camera, una specia di curridò traversa una parte di l'aghja impetrata, ma senza ghjunghje à l'arice. Si tratta di i resti d'un curridò d'accessu o puru di i resti d'anziani saccheghji (pillages). I scavi di a camera, cundutti da F. de Lanfranchi à principiu di l'anni 1970, anu datu vistiche di l'Età di u Bronzu è di l'Età di u Ferru. In giru à u monumentu, parecchie decine di frammenti d'ussidiana sò state truvate dinù, lascendu avventà un'occupazione di u locu durante u Neoliticu.

### **Figa la Sarra (Ulmetu)**

Si tratta d'una stazzona, situata nant'à a serra chì prulungheghja u Monte Barbattu versu u mare. Scopertu quand'ella apria una strada à principiu di l'anni 1980, stu megalitu fubbe scavatu da J. Cesari chì scuprì qualchì vistica, in particolare perle di l'Età di u Ferru. A stazzona si cumpone oghje ghjornu di trè teghjoni in granitu piantati à modu verticale è delimitendu una camera quasi quadrata, di più o menu 1,5 m di latu. A teghja di tittera hè stata sciappata durante a scuperta di u monumentu è i frammenti sò stati ghjittati in u tracone (ravin).

### **Funtanaccia (Sartè)**

Impiantata nant'à u pianottulu di Cauria, sta stazzona riprisenta oghje ghjornu unu di i più belli monumenti megalitichi di l'isula. Hè cunservata benissimo, malgradu a cripulatura di i so ortostati è di a so teghja di tittera. E lastre di granitu, rigularizate è allisciate, delimiteghjanu una camera di più o menu 4 m<sup>2</sup>. Quessa era forse sugellata (scellée) da una teghja, ma ne ferma solu un framentu oghje.

### **Paddaghju (Sartè)**

U situ occupa u centru d'una grande conca cinta di caos granitichi, agruttendu in particolare parecchi abitaculi furtificati di l'Età di u Bronzu. Cuntene parecchie infilarate di stantare è un cascione megaliticu. Cù i so 258 monoliti, frà quessi 3 statue-stantare urganizate in 7 file distinte, Paddaghju riprisenta a cuncolta più primurosa di stantare Mediterranee. U cascione si trova à capu di l'infilarata a più longa. Scavatu à mezu à l'anni 1960 da G. Peretti, cuntene 4 teghje in granitu, rigularizate è allisciate. Omu ci hà scupertu mubiglia di u principiu di l'Età di u Bronzu eppo un anellu in oru.

### **Pughjaredda (Sotta)**

U situ si trova in cima di u Monte Rotondu, una culletta situata à 7 chilometri da u lidu è supranendu una piaghja trà Sotta è Purtivechju. I scavi cundutti da F. de Lanfranchi trà u 1986 è u 1987 si facianu perchè ci era una stazzunuccia. Quessa hè à u centru di un'aghja impetrata è circolare d'una decina di metri di diametru. Cuntene 3 teghje di granitu fine è allisciate è una teghja di tittera, vultulata oghje fora di u monumentu. Dopu a scuperta di parecchie strutture, accantu à u monumentu, i scavi sò stati stesi nant'à 400 m<sup>2</sup> ; cusì s'hè pussutu scopre 992 pezze litiche è quasi 500 piattini ceramichi. Ste vistiche venianu da un stratu archeologicu pocu zeppu situatu nant'à u pianu sanu di u situ à una vintina di centimetri da a superficie attuale di a terra. À qualchì metru da a stazzona, una struttura rettangulare di più o menu 30 m<sup>2</sup>, delimitata da murucci in petra è cuntenuendu numerosi framenti di macine è di mullette, fubbe interpretata cum'è resti di un'abitazione. E vistiche ceramiche è litiche sò assai pare è anu e caratteristiche di e pruduzioni di u IVu millenariu.

### **Settiva (Petretu-Bicchigià)**

Stazzona lucalizzata nant'à e pendite d'una culletta, supranendu a valle di l'Orgonu. Fubbe scavata in u 1970 da R. Grosjean chì scuprì, oltre i resti d'interri medievali, una vintina di tazze di l'Età di u Bronzu. Sta stazzona in granitu, cunservata benissimo, hè fatta di trè ortostati, d'una teghja di tittera è di duie teghjucce chjudendu in parte l'entrata. Hè cinta à meza altezza da una cullettula maiò di terra mantenuta da una curona di petronculi. Sta cullettula, avendu una forma emisferica, ùn include l'entrata di a camera. St'ultima hà una forma rettangulare è si stende nant'à più o menu 5 m<sup>2</sup>. Duie stantare, frà quesse una sciappata, sò piantate à un metru da l'apertura.

### **Tivulaghju (Purtivechju)**

Lucalizatu in piaghja, à l'arice di u fiume Stabiacciu, è scavatu in l'anni 1960 da R. Grosjean è J. Liegeois, u situ si cumpunia di dui cascioni megalitichi, ognunu inseritu in un chjerchju di petre cuntenuendu parecchie stantare. Solu un cascione ferma oghje, nant'à un pughjolu à mezu à un campu. Lavuratu à modu regolare, stu campu hà datu quantità maiò d'ussidiana rimandendu à e pruduzioni di u IVu millenariu è testimuniendu di a presenza d'un abitaculu chì esistia sicuramente nanz'à l'edificazione di i megaliti.



## **Tola di U Turmentu (Serra-di-Ferru)**

Ghjè una stazzunuccia nant' à una culletta strapiumbendu u fiume Taravu è chì hè cumposta di tribbioni di granitu pocu pocu sgrussati è d'una teghja di tittera. Un petrone, in u prulungamentu di l'entrata, è parechji altri spapersi ingiru à u megalitu, puderebbenu sugerì chì u monumentu attuale hè solu a vistica d'un insieme più grande, cuntenuendu in particolare un curridò d'accessu.

## **Tremeca (Casaglione)**

Signalata in u 1966 da R. Grosjean, sta stazzona hè una di e più grussulane di Corsica è misura quasi 3 metri di longu è 2 di largu. Custruita nant' à un affiuramentu scugliosu, hè fatta di tribbioni di granitu pocu pocu sgrussati. A teghja di tittera copre solu u daretu di u monumentu, apparentendusi cusì à una stazzona à curridò. Eppure, forse chì un'altra lastra, strutta oghje ghjornu, cumpletessi tempi fà a tittera.

## **Vasculaghju (Sotta)**

U situ hè lucalizatu nant' à unu di i pughjoli accant' à u paese di Sotta. Ragruppa ottu cascioni megalitichi è parechje stantare, ma tutti sò stati assai dannighjati da travagli. I cascioni fubbenu scavati in l'anni 1960 da R. Grosjean è J. Liegeois. Scassu (terrassement) è scavamentu (creusement) d'una strada à traversu u situ anu sbuccatu nant' à un stratu archeologicu, riccu in ussidiana, stendendusi nant' à u pughjolu sanu di Vasculaghju è currispundendu forse à i righjetti d'un abitaculu neoliticu.

## **Statue-stantare**

### **Apazzu (Sartè)**

Si tratta d'un ragruppamentu di 25 monoliti, disorganizati oghje ghjornu, è cuncugliendu 2 statue-stantare. Hè lucalizatu in a valle bassa di l'Avena à u pede d'un monte graniticu. Nant' à e pendite di st'ultimu, à qualchì decina di metri da e stantare, si trova una stazzona sfundata, cumposta di 4 teghjoni di granitu allisciati benissimo, frà quessi una teghja di tittera. Un Castellu di l'Età di u Bronzu hè statu ricensatu dinù nant' à a parte in cima di u monte. E 2 statue-stantare è parechje stantare sò state addirizzate in u 1968 da R. Grosjean, chì avia scupertu u situ 10 anni nanzu.

### **Statua-stantara di Buccentone (Pieve)**

Statua-stantara, in matticciu, scuperta in u 1956 à l'entre d'un calancone scugliosu cullendu à a bocca di Tenda, à quasi 1000 m d'altitudine. Hè assai rosa è, oghje ghjornu, ùn si pò più vede l'attributi di u so visu. Hè sposta nant'à a piazza à u paese di Pieve cù a statua-stantara di Murtula è quella di Murellu, trove in u rughjone.

### **Capu Castincu (Santu Petru di Tenda)**

Stu pianottulu, nant'à i primi cuntraforti di u monte di Tenda, era cunnisciutu à u XIXu seculu pè agruttà una decina di statue-stantare. Ne ferma oghje solu una statua, abbastanza rosa. Si pò vede dinù qualchì framentu di monolitu, spapersu in machja.

### **Statua-stantara di Castaldu (Ciamannacce)**

Scuperta da G. Peretti in u 1981, in l'alta valle di u Taravu, sta statua di granitu, chì ne ferma solu u bustu, appartenia sicuramente à un'infilata sparita oghje ghjornu è ne avemu solu qualchì framentu di monoliti riaduprati in i murucci vicini. Fubbe interpretata spessu cum'è ripresentazione femminile, per via di petturali in rilievu avendu una forma circolare. Eppure, ci vole à cunsiderà piuttosto st'attributu cum'è ripresentazione di un'armatura à petturali spurghjenti (saillants), sopr'à tuttu chì a statua hè armata cù una spada.

### **Cauria (Sartè)**

U pianottulu di Cauria agrotta numerosi siti megalitichi : u situ di Cardiccia, a stazzona di Funtanaccia, u situ di Renaghju è un'infilata di megaliti chjamata I Stantari. St'ultima cuntene oghje ghjornu una trentina di monoliti, frà quessi 7 statue-stantare, urganizati in duie file parallele.

### **Statua-stantara di E Collule (Muratu)**

Si tratta di u framentu supranu d'una statua in matticciu, scupertu in u 1985 nant'à un pianottulu di u monte di Tenda. A petra aduprata pudendu rompesi faciule, nisun attributu hè statu cunservatu. Oghje ghjornu, sta statua hè allucata in u paese di Pieve.

### **Statua-stantara di l'Inzecca (U Petrosu)**

Tenuta à u museu d'Aleria, sta statua fubbe scuperta in a piaghja orientale, in u sbuccatoghju di u calancone di l'Inzecca, una di e vie maiò chì permette di traversà a Corsica, da livante à punente. Forse chì sta statua appartenessi tempi fà à un'infilata. Hè assai rosa è i so attributi si vedenu pocu.

### **Statua-stantara Nuvalella (Santa Lucia di Mercuriu)**

Scuperta in u 1995 per via di travagli agriculi, sta statua in matticciu hè a sola chì si cunnosce in u sbassu (dépression) di Corti. Fubbe scuperta scantata, in una piaghja, à l'arice di u fiume Tavignanu. Ancu s'ella hè assai rosa, presenta sempre un nasone in rilievu è 2 arechje propiu sgagate. Eppuru, ùn si pò osservà nisun attributu vestimentariu.

### **Sagone (Vicu)**

2 statue-stantare si ponu vede oghje ghjornu in l'anguli nordeste è sudeste di a catedrale Sant'Appianu in Sagone. Ùn si sà induv'elle venenu. Eppuru, un'altra statua-stantara fubbe scuperta in i circondi, vicinu à u fiume, è descritta in u 1840 da Mérimée. Sta statua-stantara d'Apricciani hè sposta à l'entre di u paese di Vicu. E 3 statue ripresentanu forse i resti d'una listessa infilarata, sparita oghje ghjornu.

### **Statua-stantara Santa Maria (Cambia)**

Cunnisciuta toccu u XIXu seculu, sta statua-stantara in matticciu hè stata edificata in core di a Castagniccia, vicinu à a cappella rumana Santa Maria di Cambia. Assai sgradata, hà una siluetta longa longa. Nant'à u fustu, si ponu vede parechje decine di cupulucce è una croce incise.

### **Statua-stantara Santa Naria (Umetu)**

Statua in granitu longa di 3,74 m (a più grande di Corsica). Fubbe studiata da R. Grosjean in u 1974. À sente à ellu, devia appartene à un'infilata strutta, situata nant'à una bocca, qualchì metru sopr'à u so impiazzamentu attuale, vicinu à l'abitaculu furtificatu di Turricciola. Hà un elmu in capu è ghjè armata cù una spada suspesa à un baldarellu (boudrier) scapulare.

### **Statua-stantara di Tavera**

Fubbe scuperta in u 1961, à un'altezza di quasi 1000 m, nant' à e pendite di u monte supranendu a valle di a Gravona. Addirizzata oghje ghjornu, si trova à qualchì metru da u locu di a so scuperta, da sottu à u situ midievale di Castellu.

### **Statua-stantara U Nativu (Barbaghju)**

Sta statua in calcare fubbe scuperta in u 1965 durante travagli agriculi. U locu fubbe scavatu da J. Magdeleine è J.-C. Ottaviani, chì messenu in risaltu un'infilarata sparita oghje ghjornu. Presenta petturali quadrati, in rilievu, fendu pensà à u fattu di purtà un'armatura. Una statua risturata è sposta nant' à a piazza à u paese di Patrimoniu.

### **Statua-stantara U Paladinu (Serra di Ferru)**

Scuperta à 750 m da a stazzona Tola di U Turmentu, ghjè una statua di granitu, assai rosa oghje ghjornu, cunnisciuta toccu u principiu di u XXu seculu. Fubbe addirizzata in u 1962, vicinu à u locu di a so scuperta, nant' à un capigliulu supranendu u fiume Taravu.

### **Statua-stantara U Scumunicatu (Carghjese)**

Statua in granitu scuperta in u 1993 in a valle di Bulbia, vicinu à un fiumicellu. I so petturali vestuti di 2 lastre rettangolari in rilievu, facenu pensà à u fattu di purtà un'armatura.

### **Cunclusionione**

« A preistoria è a protostoria di a Corsica, secondu l'usu d'altre zone, anu in cumunu unepochi di caratteri specifichi. À principiu, un'apertura nant' à u fora, pè u più versu u mondu mediterraniu occidentale (Nordu di l'Italia, di a Sardegna, u Meziornu di a Francia, a penisula iberica...) dapoi e prime occupazioni umane.

Si dice spessu : a Corsica hè una muntagna in u mare. Sta situazione piuttostu unica in u Mediterraniu spieca u ghjocu sempre in usu, durante millenarii è millenarii, trà e zone basse o litali è quelle d'altitudine. E cause principali ne sò u cambiamentu di pasculu di u bestiame è a difesa (accunciamentu di l'alta valle di u Niolu). Nimu pò capì a Preistoria o a Storia di l'isula s'ellu ùn piglia in contu stu datu fundamentale. »

Michel-Claude Weiss in « Présentation générale de la Préhistoire corse »  
(Encyclopaedia Corsicae, libru 4)

Fonte :

- Stantari n°2, aostu-uttobre 2005
- Corse Hebdo 8-14 di lugliu 2005
- Corse Hebdo, 12-18 d'aostu 2005
- <http://www.prehistoire-corse.org/> (existe plus)
- <http://www.storiacorsa.com/> (existe plus)
- <http://www.haute-corse.fr/>
- <http://membres.lycos.fr/cerpam/pages/histoire.html> (existe plus)
- <http://www.altarocca-voyages.com>